



REPUBLIKA E SHQIPËRISË
MINISTRIA E DREJTËSISË
DREJTORIA E PËRGJITHSHME E BURGJEVE

Nr. 19364 Prot.

Tiranë, më 25.11.2025

URDHËR
Nr. 2286 datë 25.11.2025

**PËR
MIRATIMIN E RREGULLORES SË BRENDSHME TË INSTITUCIONIT TË
EKZEKUTIMIT TË VENDIMEVE PENALE POJSKË, INSTITUCION PËR TË DËNUARA
DHE PARABURGOSURA GRA DHE TË MITURA**

Institucionit të Ekzekutimit të Vendimeve Penale Pojskë
Drejtorive në Drejtorinë e Përgjithshme të Burgjeve
Drejtorive të IEVP-ve

Në mbështetje të ligjit nr. 37/2017, "Kodi i Drejtësisë Penale për të Mitur"; ligjit nr. 81/2020, "Për të drejtat dhe trajtimin e të dënuarve me burgim dhe të paraburgosurve"; ligjit nr. 10173, datë 22.10.2009, "Për mbrojtjen e dëshmitarëve dhe bashkëpunëtorëve të drejtësisë"; nenit 112 të VKM nr. 209, datë 06.04.2022, "Për miratimin e Rregullores së Përgjithshme të Burgjeve"; si dhe Urdhrit nr. 624, datë 16.12.2024, të Ministrit të Drejtësisë, "Për klasifikimin e institucioneve të ekzekutimit të vendimeve penale"; me qëllim përcaktimin e organizimit, disiplinës së brendshme dhe rregullave të detajuara të trajtimit të të dënuarve dhe paraburgosurave gra dhe të mitura, me propozim të Drejtorit të Institucionit të Ekzekutimit të Vendimeve Penale Pojskë,

URDHËROJ

1. Miratohet Rregullorja e Brendshme e Institucionit të Ekzekutimit të Vendimeve Penale Pojskë, sipas tekstit bashkëlidhur këtij urdhri.
2. Ngarkohet Drejtori i IEVP Pojskë për zbatimin e këtij urdhri.
3. Drejtoritë e IEVP-ve të organizojnë punën me punonjësit për njohjen dhe zbatimin e rregullores, si dhe informimin e të dënuarve dhe të paraburgosurve.

Ky urdhër hyn në fuqi menjëherë.

DREJTORI I PËRGJITHSHËM
KLEVIS QOSE





REPUBLIKA E SHQIPËRISË
MINISTRIA E DREJTËSISË
DREJTORIA E PËRGJITHSHME E BURGJEVE
INSTITUCIONI I EKZEKUTIMIT TË VENDIMEVE PENANE “POJSKË”

RREGULLORE E BRENDSHME E INSTITUCIONIT TË EKZEKUTIMIT TË
VENDIMEVE PENALE POJSKË

KREU I
DISPOZITA TE PËRGJITHSHME

Neni 1
Objekti

Kjo rregullore përcakton mënyrën e organizimit, rregullat lidhur me trajtimin në kushtet e institucionit, të drejtat, detyrimet, mënyrën e trajtimit, regjimit dhe sjelljen e të burgosurave në IEVP Pojskë, në përputhje me parashikimet ligjore.

Neni 2
Qëllimi

Qëllimi i kësaj rregullore është të mirë përcaktojë rregullat për një zbatim efikas dhe të drejtë të Kodit të Drejtësisë Penale për të Mitur Nr.37/2017, Ligjit Nr. 81/2020, "Për të drejtat dhe trajtimin e të dënuarve me burgim dhe të paraburgosurve", Rregullores së Përgjithshme të Burgjeve, të miratuar me VKM Nr. 209 datë 06.04.2022, Urdhrit Ministrit të Drejtësisë nr. 624, datë 16.12.2024, "Për klasifikimin e institucionit të ekzekutimit të vendimeve penale Pojskë", si dhe legjisllacionit në fuqi për ekzekutimin e vendimeve penale me burgim në Republikën e Shqipërisë, në funksion të respektimit të të drejtave dhe lirive themelore të njeriut, rehabilitimit dhe riintegritimit social.

Neni 3
Fushëveprimi

Kjo rregullore zbatohet në Institucionin e Ekzekutimit të Vendimeve Penale Pojskë, Pogradec;

- për personat e dënuar me burgim, ato në gjysmë liri, të paraburgosurat dhe të miturat.
- për të burgosurat të cilët qëndrojnë përkohësisht jashtë IEVP.
- për stafin civil dhe me uniformë, lidhur me detyrimet dhe përgjegjësitë e shërbimit.

Neni 4

Trajtimi i ndryshëm dhe i përligjur i të burgosurave

Mbështetja ndaj të burgosurave të sëmura, të moshuarave, të miturave, shtetasit e huaja, të pambrojtura është e përligjur dhe nuk përbën trajtim preferencial.

Stafi vendos masat e sigurisë, sipas parashikimeve në ligj, në përputhje me shkallën e rrezikshmërisë së të burgosurve, në funksion parandalues dhe të garantimit të rendit dhe sigurisë.

Neni 5

Përkufizimet

Termat e mëposhtëm kanë këto kuptime:

1. "Anëtarët e familjes" së të paraburgosurës dhe të dënuarë janë bashkëshorti, prindërit, fëmijët, gjyshërit, vëllezërit dhe motrat, si dhe bashkëjetuesi, bashkëjetesa e të cilëve ka një karakter të qëndrueshëm dhe të provuar.
2. "E burgosur" është çdo shtetase që ndodhet në paraburgim kur ndaj saj është caktuar një ose më shumë masa sigurimi "arrest me burg", ose shtetase e dënuar me vendim gjyqësor të formës së prerë, e cila ndodhet në një institucion të ekzekutimit të vendimeve penale.
3. "E dënuar" është çdo shtetase shqiptare, e huaj ose pa shtetësi, e dënuar me vendim gjyqësor penal të formës së prerë të gjykatave shqiptare, ose e dënuar me vendim gjyqësor të dhënë nga gjykatat e huaja, vendim i cili është njohur sipas legjislacionit në fuqi dhe konvertuar dënimi me vendim të formës së prerë të gjykatave shqiptare.
4. "E paraburgosur" është çdo shtetase shqiptare, e huaj ose pa shtetësi, ndaj të cilës është dhënë masë sigurimi "arrest me burg".
5. "E mitur" është çdo shtetase nën moshën 18 vjeç, që ka mbushur moshën e përgjegjësisë penale dhe ndaj të cilës është dhënë masa e sigurisë së arrestit me burg ose një vendim gjyqësor i formës së prerë, që parashikon shprehimisht privimin e lirisë në një institucion të ekzekutimit të vendimeve penale.
6. "Personat me aftësi të kufizuar", - janë individët që kanë dëmtime afatgjata fizike, mendore, intelektuale ose ndijore, dëmtime të cilat në bashkëveprim me pengesat e ndryshme, përfshirë ato mjedisore dhe të qëndrimit, mund të pengojnë pjesëmarrjen e plotë dhe efikase të këtyre personave në shoqëri, në kushte të barabarta me të tjerët.
7. "Institucion i hapur", është institucioni ose seksioni jashtë rrethimit perimetrik të sigurisë në institucionin e ekzekutimit të vendimeve penale, në të cilin i dënuari kryen dënimin me mbikëqyrje dhe nivel minimal sigurie duke mos u mbyllur në ambientet e institucionit të ekzekutimit të vendimeve penale.
8. "Prindërimi në distancë", - është një program që zhvillohet nga IEVP-ja, i cili synon forcimin e marrëdhënieve me familjen prind-fëmijë.
9. "Risku", është probabiliteti i lartë i kryerjes së mëtejshme të një veprë penale shumë të dhunshme apo veprë penale me natyrë seksuale ndaj personave të tjerë.
10. "Vlerësimi i riskut", është procesi që bën të mundur të kuptohet risku, duke analizuar natyrën, shkallën dhe modelin e shkeljes dhe duke evidentuar karakteristikat e autorit dhe rrethanat, që kanë kontribuar në kryerjen e shkeljes, si dhe që shërben për marrjen e vendimeve nga organet përkatëse në kuadër të uljes së riskut.
11. "Trajtimi", përfshin por jo vetëm, kujdesin shëndetësor, psikologjik ose social për qëllime terapeutike, i cili shërben për të ulur riskun që paraqet personi dhe mund të përfshijë masa që përmirësojnë dimensionin social të jetës së autorit.

12. "Masë disiplinore", është masa shtrënguese ose ndaluese e dhënë për të paraburgosurën ose të dënuarën në rastet e shkeljeve të parashikuara në këtë ligj.
13. "Raste të veçanta" janë situata të rrezikshme, të cilat përbëjnë një kërcënim serioz, që ndikon ose mund të ndikojë drejtpërdrejt ose tërthorazi në jetën dhe/ose shëndetin e të burgosurës dhe që në bazë të të dhënave të besueshme rezultojnë se nuk mund të përballohet brenda kufijve normalë të menaxhimit e të administrimit të institucionit.
14. "Situatë emergjente" përfshin, por pa u kufizuar në to, një prej situatave të mëposhtme: a) fatkeqësinë natyrore, që vë në rrezik administrimin dhe menaxhimin e institucionit dhe mund të cenojë jetën dhe shëndetin e të burgosurve; b) sulmet e armatosura nga jashtë institucionit; c) revoltat masive ose të pjesshme; ç) tentativat ose arratisjet nga institucioni; d) përhapjen e sëmundjeve ngjitëse/epidemike;
15. "Torturë", është çdo veprim me anë të të cilit të burgosurës i shkaktohen qëllimisht dhimbje ose vuajtje të rënda fizike ose mendore, kur këto dhimbje ose vuajtje shkaktohen nga personeli i institucionit ose një person tjetër, që vepron në përmbushje të detyrës zyrtare ose me nxitjen apo pëlqimin e tij, i kryer për një nga qëllimet e parashikuara në Konventën kundër Torturës dhe trajtimit ose ndëshkimeve të tjera mizore, njerëzore ose degraduese

KREU II

KRITERET E VENDOSJES SË TË DËNUARAVE SIPAS VLERËSIMIT TË SIGURISË NË IEVP

Neni 6

Vendosja e të burgosurave sipas nivelit të sigurisë

1. Bazuar në vlerësimin e rrezikshmërisë dhe të nevojave individuale, të burgosurat vendosen në nivele të ndryshme sigurie, në përputhje me parashikimet e Ligjit nr. 81/2020, "Për të drejtat dhe trajtimin e të dënuarve me burgim dhe të paraburgosurve", si dhe Urdhrit Ministrit të Drejtësisë nr. 624, datë 16.12.2024, "Për klasifikimin e institucioneve të ekzekutimit të vendimeve penale". Institucioni i Ekzekutimit të Vendimeve Penale Pojske është i klasifikuar si institucion për gra dhe të dënuara të mitura, si dhe si institucion paraburgimi, me strukturë të përbërë nga një seksion sigurie të lartë, një seksion sigurie të zakonshme, një seksion sigurie të ulët, një seksion si institucion i hapur dhe një seksion paraburgimi.
2. Të burgosurat që kanë risk për shkak të profesionit apo detyrave që kanë kryer, sigurohen në seksione të ndarë nga të burgosurat e tjera.

Neni 7

Seksioni i sigurisë së lartë

1. Në seksionet e sigurisë së lartë, vendosen kategoria e të dënuarave që parashikohen në nenin 16 të Ligjit Nr.81/2020 "Për të drejtat dhe trajtimin e të dënuarve me burgim dhe të paraburgosurve".
2. Bazuar në vlerësimin e rrezikshmërisë, të dënuarit e sigurisë së lartë klasifikohen në tre regjime:
 - a. Regjimi bazë
 - b. Regjimi standart
 - c. Regjimi i zgjeruar

3. Transferimi nga një regjim më i lartë në një regjim më të ulët dhe anasjelltas kryhet me miratim të drejtorit të IEVP, pas vlerësimit të kryer nga komisioni, si dhe plotësimin të kriterëve në formularin standard.

Neni 8

Regjimi bazë i sigurisë së lartë

1. Në regjimin bazë të sigurisë së lartë, mbahen të burgosura, arratisja e të cilave do të ishte shumë e rrezikshme për sigurinë kombëtare, për publikun, ose sigurinë e shtetit dhe duhet të merren masa për pamundësimin e arratisjes së tyre.
2. Të dënuarat e sigurisë së lartë mbahen në regjimin bazë të sigurisë nga fillimi i ekzekutimit të vendimit penal në sigurinë e lartë deri kur plotësojnë një të tretën (1/3) e dënimit të dhënë dhe pavarësisht nga koha e dënimit të kryer, mbahet në këtë regjim gjithashtu kur:
 - a. ka kryer, tentative për t'u arratisur, akte dhunë që kanë sjellë pasoja të rënda për jetën ose shëndetin e stafit, të burgosurve apo vizitorëve, gjatë gjithë vuajtjes së dënimit.
 - b. ka kryer shkelje shumë të rënda sipas parashikimit të nenit 88 të Rregullores së Përgjithshme të Burgjeve, në pesë (5) vitet e fundit.
 - c. ka kryer shkelje të rënda sipas parashikimit të nenit 88 të Rregullores së Përgjithshme në dy (2) vitet e fundit.
 - d. disponohen të dhëna dhe prova për veprime dhe mosveprime si dhe sjellje, në kundërshtim me rregulloren e përgjithshme të burgjeve.
3. Të dënuarave në regjimin bazë të sigurisë së lartë, ju garantohen të drejtat e përcaktuara në Rregulloren e Përgjithshme të Burgjeve në lidhje me vizitat, telefonatat, sigurimin e ushqimit, veshjeve, trajtimin shëndetësor, ajrimin, përfshirjen në programe rehabilituese.

Neni 9

Regjimi standard i sigurisë së lartë

1. Të dënuarat e sigurisë së lartë mbahen në regjimin standard të sigurisë kur kanë kryer më shumë se një të tretën (1/3) e dënimit të dhënë dhe nuk ka prova për veprime dhe mosveprime si dhe sjellje, në kundërshtim me rregulloren e përgjithshme të burgjeve. Nuk ka kryer asnjë nga shkeljet e parashikuara në nenin 8 të kësaj rregulloreje. Të dënuarat me burgim maksimal mund të vendosen në regjimin standard, sipas kriterëve të parashikuara në këtë Rregullore, kur kanë kryer mbi 10 vite burgim.
2. Vendimi për transferimin e të dënuarës nga regjimi bazë në regjimin standard të sigurisë së lartë, shoqërohet me vlerësimin e sjelljes dhe të rrezikshmërisë, sipas formatit të vlerësimit.
3. Të dënuarave në regjimin standard të sigurisë së lartë, ju garantohen të drejtat e përcaktuara në Rregulloren e Përgjithshme të Burgjeve në lidhje me vizitat, telefonatat, sigurimin e ushqimit, veshjeve, trajtimin shëndetësor, ajrimin, përfshirjen në programe rehabilituese. Drejtoria e IEVP Pojskë mban në konsideratë zgjatjen e kohës së ajrimit, të dhënies së një vizite shtesë, të punësimit brenda institucionit, sipas mundësive që lejon infrastruktura.

Neni 10

Regjimi i zgjeruar i sigurisë së lartë

1. Të dënuarat e sigurisë së lartë mbahen në regjimin e zgjeruar të sigurisë kur ju ka mbetur më pak se një e pesta (1/5) për të përfunduar dënimin e dhënë dhe nuk ka prova për veprime dhe mosveprime si dhe sjellje, në kundërshtim me rregulloren e përgjithshme të burgjeve.

2. Të dënuarat e sigurisë së lartë, të cilët janë me moshë mbi 60 vjeçe ose kanë një paaftësi shëndetësore, mbahen (në regjimin e zgjeruar) të sigurisë së lartë, me përjashtim të rasteve kur subjektet janë përfshirë në shkellje të rënda të rregullores. Të burgosurat e sigurisë së lartë, të cilët janë paraplegjik dhe tetraplegjik ose kanë çrregullime të rënda mbahen në Seksion të Kujdesit të Veçantë, ku ka staf mjekësor dhe kujdestar.
3. Të dënuarat që vlerësohen për t'u vendosur në regjimin standart të sigurisë së lartë, si rregull mbahen në seksione të ndryshme nga të dënuarit e regjimit bazë të sigurisë.
4. Të dënuarave në regjimin e zgjeruar të sigurisë së lartë, ju garantohen të drejtat e përcaktuara në Rregulloren e Përgjithshme të Burgjeve në lidhje me vizitat, telefonatat, sigurimin e ushqimit, veshjeve, trajtimin shëndetësor, ajrimin, përfshirjen në programe rehabilituese. Drejtoria e IEVP Pojskë mban në konsideratë zgjatjen e kohës së ajrimit, të dhënies së një vizite shtesë, të punësimit brenda institucionit, sipas mundësive që lejon infrastruktura dhe planifikimin e të dënuarit për leje shpërblyese, sipas kritereve ligjore.
5. E dënuara e regjimit të zgjeruar të sigurisë së lartë, mund të transferohet në sigurinë e zakonshme, me vendim gjykatë, bazuar në kërkesën e saj, avokatit të saj, apo të Drejtorisë së IEVP, kur ka demonstruar sjellje pozitive, gatishmëri për t'u përfshirë në programe rehabilituese dhe kur rezulton pa rekorde disiplinore.

Neni 11 **Siguria e zakonshme**

1. Në seksionet e sigurisë së zakonshme, vendosen kategoria e të dënuarave që parashikohen në nenin 18 të Ligjit Nr.81/2020 "Për të drejtat dhe trajtimin e të dënuarve me burgim dhe të paraburgosurve".
2. Të dënuarave në sigurinë e zakonshme, ju garantohen të drejtat e përcaktuara në Rregulloren e Përgjithshme të Burgjeve në lidhje me vizitat, telefonatat, sigurimin e ushqimit, veshjeve, trajtimin shëndetësor, ajrimin, përfshirjen në programe rehabilituese, punësimin. Drejtoria e IEVP Pojskë, mban në konsideratë zgjatjen e kohës së ajrimit, të dhënies së një takimi shtesë, të punësimit brenda institucionit, sipas mundësive që lejon infrastruktura dhe planifikimin e të dënuarës për leje shpërblyese, sipas kritereve ligjore.

Neni 12 **Siguria e ulët**

1. Transferimi i të dënuarës nga siguria e zakonshme në seksionet e sigurisë së ulët, kryhet pasi janë plotësuar në mënyrë kumulative kushtet si vijojnë:
 - a. Janë dënuar për kundërvajtje penale, për vepra penale nga pakujdesia dhe për vepra të tjera penale, dënimi i të cilave nuk i kalon pesë vjet burgim dhe e dënuara ka kryer jo më pak se 2/3 e dënimit.
 - b. E dënuara është vlerësuar me risk të ulët për arratisje, për shoqërinë dhe komunitetin, për rishkelje.
 - c. Nuk ka asnjë histori të mëparshme të përpjekjes për t'u arratisur.
 - d. Mban qëndrim pendesë ndaj veprës penale dhe nuk mbështet mendimet kriminale;
 - e. Nuk ka kryer shkellje disiplinore të klasifikuara si shumë të rënda apo të rënda, sipas parashikimit të nenit 62 të Ligjit 81/2020 dhe nenit 88 të Rregullores së përgjithshme të burgjeve miratuar me VKM nr.209/2022, në dy vitet e fundit.
 - f. Nuk ka kontakte me të burgosurit e përfshirë në organizata të krimit të organizuar ose grupe terroriste.

5. Kontrolli personal duhet të bëhet vetëm nga punonjëset e policisë në praninë e jo më pak se 2 (dy) punonjësve femra.
6. Kontrolli i të burgosurës bëhet duke respektuar personalitetin dhe dinjitetin e tij.
7. Në përfundim të kontrollit, mbahet një procesverbal në format tip, ku shënohen sendet e lejuara të futen brenda në ambientet e banimit dhe sendet të cilat mbahen provizorisht në ruajtje deri në plotësimin e afatit të kthimit. Procesverbali nënshkruhet nga dy kontrollorët dhe e burgosura dhe një kopje futet në dosjen personale dhe kopja tjetër i jepet të burgosurës.
8. Në çdo rast, ndalohet kontrolli intim ndaj të burgosurës nga punonjësja e Policisë së Burgjeve. Kontrolli intim bëhet vetëm nga personeli shëndetësor, me autorizim të drejtorit të institucionit, vetëm kur ka dyshim të arsyeshëm se e burgosura që kontrollohet mund të ketë fshehur sende të ndaluara. Gjatë kontrollit intim, asiston edhe një punonjëse policie femër, e cila mbajt procesverbal në lidhje me kontrollin e kryer, procesverbali mbi konstatimet e bëra gjatë kontrollit, nënshkruhet në përfundim edhe nga e burgosura.

Neni 27

Kontrolli personal i të burgosurave

1. E burgosura i nënshtrohet kontrollit personal, kur ka dyshime të arsyeshme se mban sende të ndaluara, si dhe në do rast të hyrjes ose të daljes nga institucioni.
2. Kontrolli personal i të burgosurës bëhet në proporcion me nevojën që dikton kryerjen e tij dhe bëhet duke respektuar dinjitetin, besimin dhe veçori të tjera të saj.
3. Kontrolli i të burgosurës, kryhet vetëm nga stafi me të njejtën gjini, i trajnuar me metoda të përshtatshme kontrolli.
4. Kontrolli kryhet në praninë e jo më pak se 2 (dy) punonjësve femra, të cilat mbajnë procesverbal në lidhje me kontrollin e kryer.
5. Në çdo rast, ndalohet kontrolli intim ndaj të burgosurës nga punonjësja e Policisë së Burgjeve. Kontrolli intim bëhet vetëm nga personeli shëndetësor, me autorizim të drejtorit të institucionit, vetëm kur ka dyshime të arsyeshëm se e burgosura që kontrollohet mund të ketë fshehur sende të ndalura. Gjatë kontrollit intim asiston edhe një punonjëse femër, e cila mban procesverbal në lidhje me kontrollin e kryer.
6. Kontrolli intim i të burgosura bëhet sipas procedurave të parashikuara në nenin 27 të Rregullores së Përgjithshme të Burgjeve.

28

Sendet të cilat i lejohen personit të dënuar ose të paraburgosur

1. Të burgosurat mund të mbajnë sendet e mëposhtme:
 - a. Dokumente ligjore personale
 - b. Pajisje mjekësore të përshkruara nga mjeku i institucionit
 - c. Një sapun
 - d. Një shishe shampo plastike
 - e. Një furçë dhe pastë dhëmbësh
 - f. Një krehër flokësh (plastike)
 - g. Produkte higjienike për ciklin menstrual (peceta/tampone – të siguruara ose të blera)
 - h. Një deodorant (pa alkool dhe jo në kanaçe spërkatëse)
 - i. Një krem trupi ose krem fytyre

- j. Një pasqyrë plastike e vogël
 - k. Tri kapse flokësh plastike
 - l. Album me deri në 10 fotografi familjare (pa kornizë)
 - m. Pajisje për të shkruar (një laps dhe një fletore)
 - n. Librat dhe fletoret shkollore të aprovuara
 - o. Tri materiale leximi (libra, revista, materiale fetare)
 - p. Radio/CD Player pa funksion wifi dhe regjistrimi + bateri
 - q. MP3/MP4 player pa funksion wifi dhe regjistrimi
 - r. Një shkrepsë
 - s. Dy paketa cigare
 - t. Lojëra të thjeshta: letra, shah, domino
 - u. Ushqim dhe sende të blera sipas listës tek operatori ekonomik i kontraktuar
 - v. Një brisk plastik për depilim i thjeshtë.
2. Sende me vlerë personale të lejuara:
- a. Një orë dore analoge jo elektronike
 - b. Një unazë
 - c. Një zinxhir dore ose qafe (pa pjesë të mprehta)
 - d. Deri në 2 palë vëthë të vegjël (pa gjilpëra apo materiale të ndaluara)
 - e. Një palë syze ptike funksionale vetëm për të lexuar ose mbrojtje nga dielli
3. Veshmbathje të lejuara për të burgosurat:
- a. Një xhaketë ose xhup (pa elemente metalike të mprehta)
 - b. Katër bluza ose kanatiere
 - c. Katër palë të brendshme
 - d. Deri në tre palë sutjena (pa tel metalik)
 - e. Një palë këpucë ose atlete (pa lidhëse për të paraburgosurat)
 - f. Një palë mbathje sportive (pa lidhëse për të paraburgosurat)
 - g. Dy triko ose pulovra
 - h. Dy palë pantallona (ose një palë pantallona + një fund)
 - i. Dy palë rroba sportive
 - j. Dy palë pizhame
 - k. Pesë palë çorape
 - l. Një palë sandale
 - m. Një palë dorëza (për dimër – për të dënuarat)
 - n. Një kapele dimri (për të dënuarat)
 - o. Veshmbathjet me ngjyra të uniformës së policisë së burgjeve nuk lejohen.
4. Sendet e pranura nga institucioni
- a. Dy çarçafë;
 - b. Dy batanije;
 - c. Një jastëk dhe një këllëf jastëku;
 - d. Dy peshqirë (një i vogël dhe një i madh);
 - e. Një uniformë;
 - f. Një jelek për të dënuarat;
 - g. Gotë për ujë (plastike);
 - h. Pjatë për ngrënie (plastike);
 - i. Lugë plastike.
5. Për të burgosurat që punojnë;
- a. Një uniformë pune;
 - b. Një palë këpucë pune.

6. Për të dënuarit që punojnë jashtë institucionit;
 - a. I lejohet të mbajë një sasi parash (cash), jo më shumë se dy mijë lekë për shpenzime ditore dhe transport.
 - b. Një telefon i thjeshtë (jo smartphone), për të mbajtur kontakte me institucionin), dhe në momentin e kthimit në institucionit i dënuari dorëzon paratë dhe telefonin në kasetën e tij personale të vendosur pranë ambienteve të zyrës së informacioni.
 - c. Paratë nuk lejohen të mbahen nga e burgosura. Paratë duhet të depozitohen në llogarë në personale në emër të saj, përveç nëse ajo vendos që në momentin e pranimit që paratë ti kthehen familjes.
7. Sendet të lejuara në një (1) dhomë:
 - a. një (1) TV deri në 32 pol, i cili nuk akses për tu lidhur në internet.
 - b. një (1) frigorifer për dy deri në katër persona me kapacitet jo më të lartë se 250 l.
 - c. një mini ekspres kafeje me kapsula.
 - d. një tavolinë plastike dhe karrige (stola) plastike sipas numrit të të burgosurave në dhomë.
 - e. sendet të cilat kanë drejtë ti blejnë përmes operatorit ekonomik.
8. Sendet, të cilat mund t'i jepen të miturës për nxitjen e motivimin, sipas Kodit të Drejtësisë Penale për të Mitur, janë:
 - a) libra;
 - b) revista;
 - c) video-lojëra;
 - ç) materiale krijimtarie artistike;
 - d) biçikleta ose pajisje të tjera sportive, të përshtatshme për ambientet e jashtëme të institucionit.
9. Në regjimin e banimit të të burgosurave, nuk lejohet të futet asnjë send, ose pajisje, e cila është e ndërtuar në mënyrë të tillë, që nuk mund të hapet për t'u kontrolluar në brendësi të saj si dhe cdo mjet tjetër që ai vet apo modifikime të tij, mundsojnë komunikimin audio ose video jashtë institucionit
10. Për sendet e çmuara si orë dore, varse, apo unaza, sektori i sigurisë, mban regjistër të detajuar me të dhënat e markës së sendeve, datën e hyrjes në regjim dhe të dhënat e personit që e ka në pronësi (me sende të çmuara kuptohen ato sende që kanë vlerë të lartë, 200 euro).
11. Me urdhër të Drejtorit të Institucionit, për qëllime pune ose trajnimi, mund të lejohet përdorimi i pajisjeve kompjuterike me akses në internet, vetëm gjatë orarit të aktivitetit apo punës. Aksesit në internet duhet të jetë i kufizuar dhe ekskluzivisht i orientuar drejt platformave zyrtare që ofrojnë punën ose trajnimin përkatës. Aktiviteti në kompjuter mbikëqyret nga një punonjës i IEVP-së dhe pajisjet ndihmëse të lidhura me kompjuterin, si kamera, mikrofoni apo të tjera, përdoren vetëm nëse janë të domosdoshme për realizimin e qëllimit dhe gjithmonë nën kontrollin e institucionit.

Neni 29

Mjetet e punës që futen në ambientet e banimit të të burgosurave

1. Mjetet e punës, si pinca, kaçavidë, çekiç, mjet prerës, trapan etj. si dhe lëndët e përdorura, (gozhdë, bullona, elektroda, shufra hekuri, llamarinë, lëndë drusore, mermer, gurë etj) mund të futen dhe përdoren nga punonjësit e autorizuar, në regjim të brendshëm, vetëm kur është e domosdoshme, bazuar në një urdhër të drejtorit të institucionit dhe të një plani me detyra dhe përgjegjësi të detajuara për arsye të domosdoshme.

2. Kur mjetet e punës dhe lëndët që do të përdoren, urdhërohet të futen në regjimin e brendshëm, ato inventarizohen në një regjistër tip, duke përshkruar emërtimin, sasinë dhe të dhëna të tjera të nevojshme. Kontrollohen sipas procedurave dhe më pas i dorëzohen me procesverbal personit të ngarkuar për përdorimin e tyre dhe punonjësit të sigurisë.
3. Kur përfundon detyra, mjetet e punës dhe lëndët e futura në regjim të brendshëm, dalin jashtë duke u kontrolluar dhe inventarizuar sipas procesverbalit të dorëzimit.
4. Mjetet e punës mbahen në ambjente të sigurta, jashtë regjimit të brendshëm, të inventarizuara, të emërtuara dhe klasifikuara sipas rrezikut që paraqesin.
5. Procedura e kontrollit, marrjes dhe dorëzimit të mjeteve të punës, zbatohet e njëjtë edhe për mjetet dhe lëndët që përdorin të dënuarit dhe paraburgosurit në punë dore ose punë artizanale.
6. Kur një mjet pune humbet, Shefi i Policisë në IEVP organizon menjëherë kontroll të plotë deri në gjetjen e tij.

Neni 30

Pajisjet e palestrave

1. Të gjitha mjetet e forcës që ndodhen në ambientet e zhvillimit të aktiviteteve sportive (palestra), listohen, në një regjistër si inventar i elementeve të sigurisë, kontrollohet gjendja fizike e mjeteve të forcës sipas inventarit përkatës.
2. Hyrja dhe dalja e të dënuarave ose e të paraburgosurave në këto ambiente, të bëhet pas kontrollit fizik.
3. Aktiviteti në sallat sportive do të jetë i mbikëqyrur në mënyrë të vazhdueshme nga punonjësit e policisë të rolit bazë, ose, në mungesë të tyre, nga punonjës të sektorit të Burimeve Njerëzore dhe Shërbimeve, me detyrë kujdestare.

Neni 31

Vendosja e të dënuarave në IEVP

1. Përcaktimi i IEVP-së, për vendosjen ose rishpërndarjen e të dënuarave dhe të paraburgosurve, është pjesë e procesit të ndarjes dhe klasifikimit, i cili, në këtë institucion, zbatohet vetëm për femra dhe të mitura. Ky proces përfshin kategorizimin sipas statusit (e dënuar apo e paraburgosur), moshës (e mitur apo e rritur), nivelit të sigurisë (i lartë, i zakonshëm, i ulët, i hapur) dhe specifikave të veprës penale, si p.sh. grupet e strukturuar kriminale apo veprat terroriste.
 - a. Vendosja fillestare e të dënuarit në Institucionin e Ekzekutimit të Vendimeve Penale Pojskë bëhet nga Drejtoria e Përgjithshme e Burgjeve, në konsultim me Prokurorin.
 - b. Rishpërndarja e të dënuarve në seksione, bëhet nga Drejtoria e Përgjithshme e Burgjeve në bazë të kërkesës së Institucionit të Ekzekutimit të Vendimeve Penale, e cila shqyrton procesin për vendosje, apo rishpërndaje të të burgosurve.
 - c. Vendosja zakonisht bëhet në nivel institucionit, por në raste të veçanta mund të përcaktohet edhe në nivel njësie (seksioni) brenda institucionit.

5. Ditën kur e mitura mbush moshën 18 (tetëmbëdhjetë) vjeç, bëhet transferimi i të miturës në seksionin e përcaktuar nga Drejtori i Përgjithshëm i Burgjeve në urdhrin e tij.
6. E mitura që transferohet pasi ka mbushur moshën 18 (tetëmbëdhjetë) vjeç trajtohet nga personeli i kujdesit psikosocial, duke siguruar vijimësinë e programeve të zbatuara në institucionet për të miturat.

Neni 36

Vendosja për shkak të sëmundjeve infektive

E burgosura e cila vuan nga sëmundje infektive, vendoset e veçuar prej personave të dënuar ose të paraburgosurave të tjera, me urdhër të drejtorit të institucionit sipas propozimit të mjekut të institucionit.

Neni 37

Sistemimi në dhomat e banimit

1. Të burgosurave u sigurohet krevati, dysheku, jastëku me këllëfin, çarçafë dhe batanije sipas normativave ligjore dhe komodinë për vendosjen e sendeve personale. Batanijet duhet të shpërndahen sipas stinëve.
2. Të burgosurat para se të vendosen në dhoma, vlerësohen sipas një formati standard për rrezikshmërinë e veprës penale, histori dhune, konflikte, sjellje antisociale si bullizëm, urrejtje, ekstremizëm, probleme të shëndetit mendor, përdorues i lëndëve narkotike, orientimin seksual etj.
3. Vlerësimi sipas pikës 2 të këtij neni, bëhet nga komisioni i përbërë nga përgjegjësi i shërbimit social, përgjegjësi i shëndetësisë dhe shefi i policisë, të cilët plotësojnë fletë vendosjen e të burgosurit në sektor dhe dhomën e përshtatshme. Nëse lind nevoja për të ndryshuar dhomën apo sektorin e banimit, komisioni vepron në të njëjtën mënyrë si në vendosjen fillestare, duke rishikuar faktorët dhe treguesit e riskut, sipas formatit të ndarjes në dhoma.
4. Në rast se brenda në dhomën e banimit, ku janë të akomoduar dy ose më shumë të burgosura, ndodh një konflikt i pa parashikuar, ose ka informacione të besueshme për një konflikt, ose rrezik të cënimit të sigurisë, oficeri i regjimit të brendshëm në detyrë, ose oficeri në shërbim në zyrën e informacionit, vë në dijeni shefin e policisë dhe shpërndan të burgosurat, provizorisht deri sa të merret në shqyrtim nga komisioni i akomodimit dhe shpërndarjes.
5. Nga e burgosura kërkohet që dhomën në të cilën është e akomoduar ta mbajë pastër përfshirë shtratin dhe sendet e tjera personale.
6. Shtretërit duhet të jenë të rregulluar, ndërsa sendet personale me rregull të jenë të vendosur në dollapin për sendet personale.
7. E burgosura përgjigjet administrativisht për dëmshpërblimin e dëmtimeve të pronës shtetërore dhe nëse dëmtimi është kryer me dashje për të cënuar elementët e sigurisë, atëherë shkelësi kallëzohet edhe penalisht. Zhdëmtimi duhet të kryhet sipas çmimeve të inventarit brenda një muaji nga konstatimi i dëmit.

Neni 38
Hapësira e banimit dhe ndriçimi

1. Dhoma në të cilat jeton e burgosura duhet të kenë hapësirë të mjaftueshme që secila e burgosur të ketë jo më pak se gjashtë (6) metra katrorë hapësirë për dhomë të vetme dhe jo më pak se katër (4) metra katrorë për të burgosurat në dhomë të përbashkëta dhe sasi të mjaftueshme të dritës natyrore, artificiale për punë, lexim, ngrohje dhe ajrosje.
2. Dhomat duhet të kenë dritare për ndriçim të mjaftueshëm të cilat mundësojnë hyrjen e ajrit të pastër dhe të dritës e cila mundëson leximin nën dritën natyrore.
3. Gjatë natës ndriçimi në dhomat e banimit fiket, përjashtim të një rasti që ka të bëjë me shëndetin e të burgosurave, ose nëse kjo kërkohet në mënyrë të arsyetuar nga e burgosura. Ambientet e përbashkëta korridoret, shkallët, hyrjet, ambientet e ajrimit, rrugë kalimet etj. mbahen me ndriçim gjatë natës.

Neni 39
Orari ditor

1. Të gjitha aktivitetet ditore përcaktohen dhe zhvillohen sipas orari të miratuar nga Drejtori i IEVP, të përshtatur me kushtet stimore dhe veçoritë e institucionit.
2. Zgjatja e kohës së ajrimit përcaktohet nga Drejtori i Përgjithshëm, në varësi të nevojave të sigurisë, veprimeve të përbashkëta, punësimit ose vetëpunësimit, nevojave edukative dhe shkaqeve të tjera sipas nevojave të institucionit.
3. Në varësi të stinëve dhe temperaturave, menaxhohet edhe hapja e dyerve të dhomave të të burgosurave, përjashtimisht në rast të konflikteve apo incidenteve ndërmjet të të burgosurave dhe me stafin, ku dyert mbyllen dhe komunikohet e veprohet duke hapur vetëm një derë në rast nevojë.

KREU IV
NJOHJA ME JETËN NË INSTITUCION DHE TË DREJTAT E DETYRIMET E TË BURGOSURAVE

Neni 40
Njohja me të drejtat dhe detyrimet

1. Menjëherë pas pranimit në IEVP e burgosura njoftohet me shkrim për të drejtat dhe detyrimet që i ka gjatë qëndrimit në institucion. E burgosura që nuk di shkrim dhe lexim informohet gojarisht.
2. Personat e burgosur që janë shtetase dhe nacionalitete të tjera, informohen nëpërmjet një përmbledhje të rregullave të shkruara, në një nga gjuhët ndërkombëtare në pamundësi të gjuhës përkatëse.
3. IEVP harton një fletë palosje me rregullat, të drejta dhe detyrimet, përfitimet, vizitat.
4. Për çdo 15-20 të burgosur caktohet një punonjës i rolit bazë si pikë kontakti, i cili koordinon punën për trajtimin e kërkesave dhe ankesave, vizitave, akomodimin etj. Punonjësi i kontaktit caktohet me urdhër të brendshëm të drejtorit të institucionit, bazuar në aftësitë komunikuese, eksperiencën dhe motivimin e tij.

Neni 41
Të drejtat e të burgosurave

1. Institucioni i ekzekutimit të vendimeve penale, ju garanton të burgosurave, pa asnjë dallim të gjitha të drejtat e parashikuara në nenin 20, 36 dhe 43 të Rregullores së Përgjithshme të Burgjeve, të miratuar me VKM Nr.209, datë 06.04.2022, në Ligjin Nr.81/2020 si dhe Kushtetutën e Republikës së Shqipërisë.
2. Të burgosurat trajtohen në mënyrë të barabartë dhe pa diskriminim mbi bazë gjinie, race, ngjyre, përkatësie etnike, gjuhe, feje, bindjeje politike, fetare ose filozofike, orientimi seksual, identiteti gjinor, gjendjeje ekonomike, arsimore ose shoqërore, përkatësie prindërore, moshe, gjendjeje familjare ose martesore, gjendjeje shëndetësore, aftësie të kufizuar, shtetësie, ose përkatësie në një grup të caktuar, ose për çdo shkak tjetër që përben diskriminim.
3. Të burgosurave me çrregullime të shëndetit mendor u garantohej trajtim i barabartë, jo diskriminues, duke respektuar integritetin fizik dhe dinjitetin njerëzor. Trajtimi i tyre bëhet sipas standardeve shëndetësore që zbatohen edhe për kategoritë e tjera të personave me çrregullime të shëndetit mendor.
4. Të burgosurave me aftësi të kufizuara u garantohej liritë dhe të drejtat themelore të njeriut, trajtimi jo diskriminues për shkak të aftësisë së kufizuar, duke plotësuar nevojat specifike për aftësimin dhe riaftësimin e tyre.
5. Të burgosurat me shtetësi të huaj, ose pa shtetësi trajtohen duke mbajtur parasysh situatën e tyre të veçantë dhe nevojat individuale. Punonjësit e institucionit ndërmarrin veprime të nevojshme për të shmangur diskriminimin dhe për të zgjidhur probleme specifike, me të cilat këta persona përballen në institucion, gjatë transferimit dhe pas liritë.
6. Masat e veçanta, që janë të nevojshme të zbatohen për respektimin e lirive dhe të drejtave të grupeve të veçanta të të burgosurve, nuk konsiderohen diskriminim sipas kësaj rregulloreje.
7. Gjatë qëndrimit në institucion të burgosurës, në përputhje me legjislacionin në fuqi, kanë këto të drejta:
 - a. u sigurohet takimi, korrespondenca, bisedat telefonike me avokatët duke pasur kohë të mjaftueshme dhe në konfidencë të plotë;
 - b. informohen në kohë dhe vazhdimësi për të drejtat e tyre;
 - c. u sigurohet fjetje në krevat të veçantë me rroba fjetje, sipas kushteve klimaterike, si dhe ndriçim të përshtatshëm;
 - d. u sigurohet ushqim 3 (tre) herë në ditë, sipas normave të përcaktuara në legjislacionin në fuqi dhe aktet nënligjore, për trajtimin e të dënuarve dhe të paraburgosurve;
 - e. të kenë llogari bankare personale, të cilën mund ta përdorin për nevojat e tyre;
 - f. të takohen me anëtarët e familjes, ose me persona të ndryshëm nga anëtarët e familjes;
 - g. t'u sigurohet shërbimi i kujdesit shëndetësor 24 (njëzet e katër) orësh;
 - h. të paraqesin kërkesa dhe ankesa tek personeli i institucionit dhe pranë çdo institucioni tjetër;
 - i. t'u sigurohet e drejta dhe fshehtësia e korrespondencës;
 - j. e drejta e bisedave telefonike;
 - k. e drejta e ajrimit;
 - l. të marrin pjesë në aktivitete argëtuese dhe edukative, që organizohen nga institucioni;
 - m. e drejta e punësimit dhe punës, për sa është e mundur;
 - n. e drejta e lirisë së besimit dhe ushtrimit të riteve fetare;
 - o. e drejta e ndihmës social-psikologjike;

- p. e drejta e përdorimit të sendeve personale të lejuara, sipas parashikimeve në këtë rregullore;
- q. çdo e drejtë tjetër e parashikuar në legjislacionin në fuqi.
- r. E drejta e votës sipas parashikimeve në Kodin Zgjedhor dhe akteve të tjera ligjore.
- s. Shtetasit e huaja kanë të drejtë të marrin kontakte me përfaqësitë diplomatike të vendit të tyre, dhe gëzojnë të njëjtat të drejta dhe detyrime me të burgosurit e tjera, për aq sa nuk parashikohet ndryshe në këtë rregullore.

Neni 42

Detyrimet e të burgosurave

Të burgosurat kanë detyrimin të zbatojnë rregullat e institucionit si dhe të kenë sjellje korrekte me të burgosurit e tjerë dhe personelin e institucionit, siç parashikohet në nenin 83 të Rregullores së Përgjithshme të Burgjeve, të miratuar me VKM Nr.209, datë 06.04.2022 dhe në Ligjin Nr.81/2020

1. Të burgosurat nxiten që të përfshihen në aktivitete edukative, kulturore, sportive dhe punësimi.
2. Të burgosurat kanë detyrimin të zbatojnë rregullat e institucionit, si dhe të kenë sjellje korrekte me të burgosurit e tjera dhe personelin e institucionit.
3. E burgosura gjatë qëndrimit në institucion, detyrohet:
 - a. të mbajë të pastër e të rregullt mjedisin e banimit dhe mjediset e përbashkëta;
 - b. të kujdeset për higjienën personale;
 - c. të mos mbajë dhe qarkullojë sende të ndaluara, të cilat rrezikojnë rendin, jetën dhe shëndetin e të burgosurve dhe personelit, objekte që përbëjnë vepër penale, mjete që ndikojnë negativisht në hetim, si dhe vlera monetare të çdo lloji;
 - d. të krijojë marrëdhënie korrekte me të burgosurit e tjera, si dhe me personelin e institucionit;
 - e. të zbatojë udhëzimet e personelit të institucionit;
 - f. të dëmshpërblejë vlerën përkatëse në rastet e dëmtimit të materialeve që janë pronë e institucionit, ose e të burgosurve të tjerë;
 - g. të zbatojë programet ditore të institucionit;
 - h. të respektojë dinjitetin e pjesëtarëve të komunitetit dhe të personelit;
 - i. të informojë menjëherë drejtorin e institucionit për rrethanat që mund të rrezikojnë sigurinë, jetën e të burgosurve, ose shkeljen e rregullave të brendshme në institucion.

KREU V

USHQIMI, TRAJTIMI SHËNDETËSOR DHE ZBATIMI I MASAVE HIGJIENTIKE

Neni 43

Ushqimi

1. Të burgosurave u sigurohet ushqim për tri vaktet, sipas normave dhe llojshmërisë, të përcaktuara në urdhrin e përbashkët të Ministrit të Drejtësisë dhe Ministrit të Shëndetësisë dhe Mbrojtjes Sociale.
2. E burgosura mund të blejë produkte ushqimore, cigare dhe sende të tjera tek operatori i kontraktuar me të ardhurat që ka në llogarinë e saj.

3. Institucioni u siguron të burgosurave të sëmura dietë të veçantë, sipas rekomandimeve të mjekut.
4. Menyja sipas vakteve përcaktohet nga personeli i institucionit, në përputhje me normat e ushqimit të parashikuara në urdhrin e përbashkët të Ministrisë së Drejtësisë dhe Ministrisë së Shëndetësisë.
5. Në qoftë se e burgosura, për shkak të ndërgjegjes ose besimit fetar, kërkon një ushqim të ndryshëm, kjo kërkesë respektohet nga personeli i institucionit në përputhje me rregullat fetare dhe mundësitë praktike të institucionit.
6. Sektori i shëndetësisë, i policisë dhe i logjistikës, përpilojnë një raport të përbashkët, të hollësishëm, për sasinë e ushqimit, të ndarë sipas kategorive të të burgosurave.
7. Për të miturat personeli merr parasysh nevojat ushqimore, duke siguruar një menyu të përshtatur dhe ushqime të larmishme. Ushqimi duhet të jetë i balancuar, i shëndetshëm dhe në funksion të rritjes, zhvillimit dhe mirëqenies së tyre, në përputhje me standardet e kujdesit për këtë grupmoshë.

Neni 44

Shpërndarja e ushqimit

1. Ushqimi përgatitet në kuzhinë dhe jepet si rregull në mjedise të banimit, duke u shpërndarë individualisht në enë personale të të burgosurës.
2. Të burgosurat e sëmura, të miturave, grave shtatzënë, ushqimi u sigurohet sipas rekomandimit të mjekut.
3. Menyja sipas vakteve e ushqimit ditor përcaktohet në menynë javore.
4. Të burgosurave duhet t'u sigurohet në vazhdimësi ujë i pijshëm.

Neni 45

Higjiena

1. Të burgosurave u sigurohen pajisje dhe mjetet e nevojshme për higjienën personale dhe të ambienteve.
2. Çdo institucion siguron shërbime periodike të pastrimit të hapësirave, veshmbathjes dhe pajisjeve personale, si dhe prerjes së flokëve dhe organizon kontrollin e tyre, jo më pak se një herë në javë.
3. Higjiena personale mund të bëhet me detyrim vetëm për arsye të veçanta higjienë sanitare, sipas kërkesës së shërbimit shëndetësor dhe me urdhrin e drejtorit të institucionit.
4. E burgosura është e detyruar që për çdo ditë të mbajë higjienën personale dhe të përgjithshme.
5. Ndërresat, çarçafët dhe këllëfi i jastëkut ndërrohen të paktën një herë në 15 (pesëmbëdhjetë) ditë, ndërsa batanijet të paktën çdo 3 muaj. Rrobat dhe ndërresat personale të personit të burgosur lahen dhe thahen në lantanerinë e institucionit.
6. Të burgosurat kanë të drejtë të lahen në dushe jo më pak se tre herë në javë dhe në çdo rast kur kthehen nga ushtrime fizike, sporti, apo puna. Dushet duhet të jenë të përshtatshme dhe të garantojnë privatësinë e personit.
7. Të burgosurat kanë të drejtë të mbajnë me vete sende të nevojshme për kujdesin personal dhe higjienën, veçanërisht ato që lidhen me nevojat e tyre si femra.

Neni 46

Shërbimet e kujdesit shëndetësor

Shërbimet e kujdesit shëndetësor, ofrohen sipas parashikimeve të Rregullores së Përgjithshme të Burgjeve, miratuar me VKM Nr.209, datë 06.04.2022 dhe në Ligjin Nr.81/2020 "Për të drejtat dhe trajtimin e të dënuarve me burgim dhe të paraburgosurve"

1. Të burgosurave u ofrohen programe dhe shërbime specifike sipas nevojave të tyre, si dhe informim në gjuhë të kuptueshme për:
 - a. kujdesin shëndetësor,
 - b. parandalimin e sëmundjeve,
 - c. higjienën vetjake,
 - d. format e dhunës dhe abuzimit.
2. Kujdesi shëndetësor bazohet në nevojat gjinore dhe përfshin:
 - a. kontroll të plotë mjekësor fillestar,
 - b. mundësisht trajtim nga personel femër,
 - c. vlerësim gjinekologjik dhe obstetrik.
3. Gjatë kontrollit gjithëpërfshirës mjekësor identifikohen:
 - a. sëmundjet seksualisht të transmetueshme dhe ato të gjakut,
 - b. gjendja e shëndetit mendor, përfshirë stresin post-traumatik dhe rrezikun e vetëdëmtimit,
 - c. varësitë nga droga, alkooli ose substancat psikotrope,
 - d. rastet e dhunës dhe abuzimit të përjetuar para pranimit.
4. Në varësi të riskut, ofrohen testime për HIV me këshillim para dhe pas testit.
5. Grave që kanë përjetuar dhunë fizike, psikologjike ose seksuale u ofrohen programe trajtimi dhe rehabilitimi.
6. Sigurohen kontrole periodike nga:
 - a. mjeku gjinekolog,
 - b. mjeku psikiatër,
 - c. specialistë për sëmundjet e grave dhe kancerin e gjirit.
7. Gratë shtatzëna ose lehona, trajtohen në qendra obstetrikogjinekologjike jashtë institucionit gjatë shtatzënisë, lindjes dhe periudhës pas lindjes.
8. Fëmijët e nënave të burgosura marrin shërbim shëndetësor nga strukturat publike përkatëse.
9. Trajtimi i çrregullimeve të shëndetit mendor bëhet sipas legjislacionit për:
 - a. shëndetin mendor,
 - b. trajtimin e të dënuarve dhe të paraburgosurve,
 - c. akteve nënligjore në fuqi.
10. Gratë me probleme të shëndetit mendor kanë të drejtë për trajtim të posaçëm në:
 - a. struktura të specializuara,
 - b. qendrën spitalore të burgjeve, sipas rastit.
11. Shërbimi shëndetësor gjatë gjithë qëndrimit në institucion mbulohet nga sigurimi i detyrueshëm shëndetësor dhe respekton standardet që zbatohen për shoqërinë në përgjithësi.
12. Institucioni siguron kushtet, mjetet dhe personelin për mbrojtjen e shëndetit të grave të burgosura.
13. Çdo kërkesë shëndetësore trajtohet nga shërbimi mjekësor dhe çdo kontroll dokumentohet në kartelën shëndetësore.
14. Shërbimet shëndetësore garantojnë:
 - a. parandalimin, diagnostikimin dhe mjekimin e sëmundjeve,
 - b. furnizimin me barna dhe pajisje në raste emergjence,
 - c. profilaksinë e sëmundjeve infektive e ngjitëse,
 - d. edukimin sanitar dhe higjienën e mjedisit,

- e. monitorimin e të sëmurëve kronikë.
15. Mjeku njofton drejtorin nëse gjendja fizike ose mendore e një të burgosure përkeqësohet ose rrezikon të përkeqësohet.
 16. Shërbimi shëndetësor funksionon 24 orë; vizitat rutinë realizohen 09:30–14:00 dhe jashtë këtij orari kryhen vetëm urgjencat.
 17. Vizitat mjekësore dhe stomatologjike bëhen pa praninë e personelit të sigurisë, përveç rasteve kur vlerësohet rrezik.
 18. Personeli shëndetësor kontrollon çdo mëngjes higjienën dhe mbledh kërkesat për vizita.
 19. Shërbimi stomatologjik ofrohet çdo ditë nga ora 09:30-14:00. Shërbimet/trajtimet e specializuara që nuk mund të ofrohen në Institucionin e ekzekutimit të vendimeve penale, me kërkesë të burgosurave dhe në bazë të rekomandimit të mjekut stomatolog dhe miratimit të drejtorit të institucionit, e burgosura me shpenzimet e saj, mund të dërgohet për trajtim në institucione private në vendin më të afërt me institucionin IEVP.
 20. Institucioni ka shërbim farmaceutik për nevoja të parandalimit dhe trajtimit të shëndetit të të burgosurave.
 21. E burgosura mund të kërkojë vizita nga specialistë me shpenzimet e saj ose të dërgohet në spitale publike me rekomandim të mjekut dhe miratim të drejtorit të Institucionit, në përputhje me procedurat e shoqërimit dhe mbikëqyrjes në spitale.
 22. Në raste urgjente, jashtë orarit zyrtar, personeli shëndetësor me miratimin e specialistit të Informacionit, realizon lëvizjen e të burgosurës të sëmurë sipas rastit në spitalin publik konform rregullave të sigurisë.
 23. Raste të dyshuara ose ka sëmundje ngjitëse, izolohet menjëherë në mjedise të posaçme dhe trajtohet sipas standardeve të njëjta me personat e të njëjtës kategori jashtë institucionit.
 24. Kur diagnostikimi/mjekimi nuk realizohet në institucion, e burgosura dërgohet në Qendrën Spitalore të Burgjeve.
 25. E burgosura e sëmurë është e detyruar të zbatojë udhëzimet e mjekut gjatë terapisë. Pa lejen e mjekut, e burgosura nuk mund të mbajë asnjë lloj medikamenti dhe nuk mund t'i përdorë ato. Medikamentet i jepen të burgosurës të sëmurë nga personeli shëndetësor sipas llojit, mënyrës dhe kohës së rekomanduar nga mjeku në kartelën e të sëmurës. Medikamentet merren në farmacinë e institucionit nga infermieri, sipas recetës së lëshuar nga mjeku.
 26. Medikamentet administrohen vetëm nga personeli shëndetësor sipas recetës.
 27. Të burgosurave u lejohet të marrin medikamente nga të afërmit ose t'i blejnë vetë ato me shpenzimet e tyre, në rastet kur këto medikamente nuk rimbursohen dhe nuk disponohen në farmacinë e institucionit. Këto medikamente, mund të përdoren vetëm me rekomandim të mjekut të institucionit. Mbajtja e medikamenteve në dhomën e të burgosurës për vetë administrim, apo çdo lloj abuzimi tjetër, duke përfshirë edhe dhënien e tyre të burgosurve të tjera, është i ndaluar.
 28. Të burgosurat ish përdoruese të lëndëve narkotike, mund të trajtohen me metadon apo barna, vetëm me rekomandim të mjekut specialist me dozën e rekomanduar. Medikamenti metadon administrohet vetëm nga stafi shëndetësor dhe aplikohet në ambientin e infermierisë në prani të personelit shëndetësor, me nënshkrimin e të burgosurit. Vetë administrimi i metadonit nga e burgosura, nuk lejohet.
 29. Ndalohet çdo eksperiment shëndetësor që mund të shkaktojë dëmtime fizike, mendore ose pasoja të tjera.

Neni 47

Detyrat e mjekut në rast të dëmtimeve traumatike të të miturës

1. Në rast se konstatohen dëmtime traumatike, mjeku i institucionit regjistron konstatimet e bëra gjatë kontrollit mjekësor në një procesverbal të vecantë. Ky procesverbal mbahet në kartelën mjekësore të të miturës.
2. Në këtë procesverbal, mjeku shënon:
 - a) përshkrime të hollësishme për pjesët e trupit ku konstatohen dëmtimet traumatike;
 - b) deklarin e bërë nga i mituri gjatë kontrollit mjekësor, ku përfshihet përshkrimi për gjendjen shëndetësore dhe çdo pretendim për keqtrajtime;
 - c) një përshkrim të hollësishëm të ekzaminimit objektiv të kontrollit shëndetësor;
 - d) përfundimet e kontrollit mjekësor, të cilat tregojnë shkallën e përputhshmerisë ndërmjet pretendimeve të ngritura nga e mitura dhe evidentimit të shenjave.
3. Personeli shëndetësor fotografon dëmtimet e konstatuara, të cilat vendosen në dosjen mjekësore të të miturës.
4. Një kopje e procesverbalit i jepet të miturës, prindit ose kujdestarit, si edhe mbrojtësit të tij ligjor. Në çdo rast marrësi i procesverbalit nënshkruan për njoftimin.
5. Në rast se vëren dëmtime traumatike të të miturës, mjeku e referon menjëherë të miturën tek psikologu i institucionit.
6. Mjeku i raporton menjëherë drejtorit të institucionit dhe prokurorit për të gjitha rastet e dëmtimeve traumatike të të miturës, pavarësisht se nga çfarë janë shkaktuar.

Neni 48

Kërkesa për vizitë mjekësore

1. E burgosura që ka probleme shëndetësore paraqet kërkesën me shkrim ose me gojë për vizitë mjekësore tek personeli shëndetësor ose personeli i sigurisë në regjim. Personeli shëndetësor i turnit, harton listën përkatëse dhe ja dorëzon mjekut të IEVP-së për të bërë vizitën, me përjashtim të rasteve urgjente.
2. Lëvizja e të burgosurave nga dhoma për në infermieri dhe anasjelltas, me përjashtim të rasteve urgjente, bëhet një nga një, sipas kërkesës së mjekut. Gjatë vizitës mjekësore, punonjësia shoqëruese qëndron jashtë dhomës deri në mbarimin e vizitës.
3. E burgosura nuk mund të mbajë apo të përdorë asnjë lloj medikamenti mjekësor pa miratimin e mjekut.

Neni 49

Kujdesi shëndetësor për kategori të veçanta

1. Shërbimi shëndetësor në institucion organizohet pa diskriminim për shkak të statusit ligjor të personit, ose për ndonjë arsye tjetër, që mund të përbëjë diskriminim.
2. Trajtimi i personave me çrregullime të shëndetit mendor bëhet sipas legjislacionit në fuqi për shëndetin mendor. Të burgosurat që gjenden në institucionet e ekzekutimit të vendimeve penale dhe që vuajnë nga çrregullime të shëndetit mendor, gëzojnë të drejtën për trajtim të veçantë shëndetësor dhe mbahen në sektor të kujdesit të veçantë (SKV).
3. Trajtimi shëndetësor i të burgosurave përfshin kontroll të plotë për të përcaktuar nevojat e kujdesit shëndetësor parësor duke përfshirë, por pa u kufizuar në kontrollet për:
 - a. SST (Semundje seksualisht të transmetueshme)
 - b. Semundje të lindura të gjakut

- c. Kujdesi ndaj shëndetit mendor
 - d. Çrregullime post-traumatike
 - e. Rrezikun e vetëdëmtimit ose vetëvrasjes
 - f. Praninë e varësisë ndaj lëndëve narkotike
 - g. Abuzimin seksual dhe forma të tjera të dhunës që mund të kenë pasur përpara pranimit në institucion.
4. Të burgosurave ju ofrohen programe dhe shërbime në përputhje me moshën e tyre. Ato informohen për kujdesin shëndetësor, për parandalimin e sëmundjeve të ndryshme, higjienën vetjake, për format e dhunës dhe çdo lloj abuzimi.
 5. Të burgosurave ju sigurohet kontroll periodik nga mjeku psikiatër dhe mjek specialist.
 6. Të burgosurat që shfaqin shenja të përdorimit të drogës, substancave psikotrope ose alkoolit, apo shenja të stresit, trajtohen sipas programeve shëndetësore dhe sociale që zbatohen në shoqërinë jashtë institucionit.
 7. Personat që mbartin sëmundje infektive trajtohen në mënyrë jo diskriminuese dhe sipas standardeve që zbatohen për këto kategori në institucionet spitalore.
 8. Gjatë pranimit, e burgosura vlerësohet lidhur me rrezikun për vetëdëmtime dhe vetëvrasje në një format standard. Në rast të identifikimit të shenjave, mendimeve, rrethanave sociale dhe psikologjike, merren masa të menjëhershme për sistemimin, monitorimin dhe zbatimin e një plani ndërhyrje. Të burgosurat e kësaj kategorie në asnjë rrethanë nuk sistemohen në dhomë të vetmuar dhe mbahen në vëzhgim nga punonjësia e sigurisë, duke e mbajtur derën të pa kyçur.
 9. Rastet e refuzimit të ushqimit trajtohen sipas protokollit standard të miratuar.
 10. Rastet e kufizimit fizik të personave me problemet të shëndetit mendor, bëhet në përputhje me ligjin për shëndetin mendor, me rekomandim të mjekut psikiatër sipas formatit standard të miratuar nga D.P.Burgjeve. Mënyrat e kufizimit fizik, janë përdorimi i medikamenteve, imobilizimi fizik, përdorimi i mjeteve/pajisjeve të kufizimit fizik dhe izolimi. Nuk lejohet përdorimi i prangave metalike, apo plastike për kufizimin fizik të të burgosurave me probleme të shëndetit mendor.
 11. Për koordinimin e punës për trajtimin e të burgosurve me probleme të shëndetit mendor, caktohet një punonjës si koordinator i ekipit multidisiplinar.

Neni 50

Vizitat mjekësore jashtë institucionit të ekzekutimit të vendimeve penale

1. Të burgosurave ju lejohet që me shpenzimet e veta, të kryejnë vizita dhe mjekime të specializuara në klinika të tjera jashtë institucionit, me miratimin e drejtorit të institucionit, nëqoftëse shërbimi nuk mund të ofrohet në spitalet publike, gjithnjë duke marrë në konsideratë afërsinë me institucionin.
2. Transporti dhe ruajtja e të burgosurave bëhet nga institucioni me shoqërim nga personeli shëndetësor dhe punonjësit e policisë.
3. Gjatë mbikëqyrjes së të burgosurës si pacient në spitale publike apo private, nuk lejohet përdorimi i mjeteve të kufizimit fizik dhe fiksimit të pacientit në krevat. Për raste që vlerësohen me rrezikshmëri për arratisje apo për jetën e stafit, merren masa për të shtuar personelin mbikëqyrës.
4. Nuk lejohet asnjëherë përdorimi i mjeteve të kufizimit tek gratë që janë me dhimbjet e lindjes, gjatë lindjes apo menjëherë pas lindjes së fëmijës.

Neni 51

Medikamentet mjekësore, sigurimi dhe shpërndarja e tyre

1. Pas vizitës mjekësore, mjeku i institucionit ose mjeku specialist sipas llojit të sëmundjes së të burgosurave, rekomandon trajtimin e nevojshëm, që përshkruhet në kartelën mjekësore të të burgosurave. Njëkohësisht u jepen rekomandimet e rastit personelit shëndetësor dhe farmacistit për veprimet e mëtejshme.
2. Administrimi i medikamenteve bëhet nga farmacia e institucionit, ndërsa shpërndarja bëhet nga personeli shëndetësor.
3. Me miratimin dhe udhëzimin e mjekut të institucionit të burgosurat lejohen të trajtohen me medikamente të siguruara me shpenzimet e tyre.

Neni 52

Veçimi mjekësor

1. Në rastet e sëmundjeve ngjitëse mjeku vendos për veçimin e të burgosurës, duke e mbajtur nën kontroll të vazhdueshëm dhe njofton menjëherë drejtorin e institucionit për situatën.
2. Në rastet e konstatimit të sëmundjeve ngjitëse dhoma dezinfektohet, ndërsa e burgosura vendoset në një mjedis të veçantë ose dërgohet në Qendrën Spitalore të Burgjeve për trajtim të specializuar.
3. Mjeku vendos për pushimin e veçimit kur nuk ekzistojnë më shkaqet që çuan në vendosjen e veçimit.

Neni 53

Konfidencialiteti i të dhënave mjekësore

1. Kartela mjekësore e të burgosurës administrohet vetëm nga mjeku dhe ruhen të mbyllura sipas rekomandimit të Komitetit për Parandalimin e Torturës.
2. Fotokopje e kartelës mjekësore, i vihet në dispozicion vetëm gjykatës dhe prokurorisë me kërkesë me shkrim. Mbrojtësit ligjor të të burgosurës i vihet në dispozicion informacion shëndetësor bazuar në kartelën mjekësore dhe jo fotokopje të kartelës.

Neni 54

Kërkesat dhe ankesat

1. Kërkesat dhe ankesat bëhen sipas përcaktimeve të ligjit për të drejtat dhe trajtimin e të dënuarve me burgim dhe të paraburgosurve.
2. E mitura ka të drejtë të bëjë kërkesë verbale për ushtrimin e së drejtës së takimeve, vizitave dhe korrespondencës. Në rast se, e mitura nuk bën kërkesë personeli e riinformon për të drejtën për të mbajtur kontakt me familjen dhe rrethin shoqëror.
3. Drejtori i institucionit, i trajton vetë ose delegon kërkesat apo ankesat për ndjekje sektorit përkatës për verifikim, zgjidhje dhe raportim.
4. Sekretaria e institucionit mban dhe përditëson regjistrin e kërkesave ose ankesave të të burgosurave, në formë shkresore dhe elektronike. Formatit dhe përmbajtja e regjistrit është sipas përcaktimeve në Rregulloren e Përgjithshme të Burgjeve.
5. Afati i shqyrtimit të ankesave varet nga lloji i kërkesave, por nuk mund të kalojë afatet e parashikimit në ligj. Kërkesa dhe ankesa të cilat janë në kompetencë të sektorëve të IEVP duhet të trajtohen brenda afatit nga një deri në 5 ditë pune. Kërkesa dhe ankesa të cilat janë

në kompetencë të Drejtorit të IEVP duhet të trajtohen nga një ditë deri në 10 ditë. Kërkesa dhe ankesa që janë jashtë IEVP, trajtohen brenda afatit të parashikuar në aktet ligjore.

KREU VI

TRAJTIMI I TË BURGOSURVE

Neni 55

Korrespondenca

1. Çdo e burgosur ka të drejtë të mbajë korrespondencë dhe t'i garantohet fshehtësia e saj.
2. Për të burgosurat që nuk i kanë mundësitë, personeli i institucionit, vë në dispozicion mjetet e nevojshme për korrespondencë.
3. Për të miturat korrespondencat mund të kufizohen dhe mbikqyren për arsye të kryerjes së hetimeve, ruajtjes së rendit publik, sigurisë, parandalimit të veprave penale, por këto kufizime, përfshi kufizimet e veçanta të caktuara me vendim gjykatë ose urdher prokuror, duhet të lejojnë një nivel minimal kontaktesh.
4. Korrespondenca duhet të hidhet në kutinë postare të IEVP-së, e cila merret nga një punonjës i institucionit. Shpërndarja e korrespondencës së ardhur bëhet nga punonjësi i institucionit të ngarkuar me këtë detyrë, duke ruajtur fshehtësinë e saj.
5. Në rastet kur ka dyshime të bazuara se në korrespondencë ka sende të ndaluara, ajo hapet në prani të të burgosurës dhe të drejtorit të institucionit.
6. Drejtori i institucionit, me vendim të prokurorit ose të gjykatës, mund të kufizojë të drejtën e të burgosurës për korrespondencë, nëse kjo është e nevojshme për kryerjen e veprimeve procedurale penale.
7. Të burgosurat kanë të drejtë të marrin me postë pako nga familjarët, e cila mund të përmbajë veshje sende për higjienë dhe libra, për aq sa kjo e drejtë nuk shpërdorohet nga familjarët ose të burgosurit. Nuk lejohet marrja e ushqimeve me pako nga posta apo familjarët.
8. Marrja e pakos me postë bëhet nga personi i ngarkuar për tërheqjen e korrespondencës së të burgosurve dhe i jepet personit që i adresohet dhe hapet në prezencë të punonjësit që e ka tërhequr dhe të burgosurit që i adresohet kundrejt nënshkrimit të të burgosurit në një regjistër të posaçëm.

Neni 56

Mbrojtja e të dhënave personale

1. Personeli i institucionit duhet të zbatojë legjislacionin në fuqi për mbrojtjen e të dhënave personale, duke përfshirë edhe vendimet, apo udhëzimet e Komisionerit për Mbrojtjen e të Dhënave Personale, me qëllim arritjen e një niveli sigurie të përshtatshëm gjatë përpunimit të të dhënave personale të të burgosurve, nëpërmjet përdorimit të mjeteve të punës.
2. Veprimi apo mosveprimi, në kundërshtim me këtë dispozitë, përbën shkelje disiplinore dhe dënohet sipas legjislacionit në fuqi që rregullon marrëdhënien e punës së personelit.

Neni 57

Përdorimi i të dhënave personale

1. Të dhënat personale lidhur me të burgosurat duhet të administrohen në përputhje me kërkesat ligjore dhe me ato mund të njihen Ministri i Drejtësisë, Drejtori i Përgjithshëm i

Burgjeve, Drejtori i Policisë, Drejtori i institucionit, Shefi i Policisë, Përgjegjësi i Sektorit Ligjor dhe çdo autoritet tjetër në përputhje me legjislacionin në fuqi, ose nga personat e autorizuar prej tyre.

2. Personat të cilët, gjatë ushtrimit të funksioneve të tyre, vihen në dijeni me të dhënat personale, detyrohen të ruajnë dhe të mos i nxjerrin këto të dhëna pas përfundimit të detyrës. Këto të dhëna mund të nxirren vetëm në rastet e parashikuara me ligj.
3. Të dhënat personale për çdo të burgosur administrohen në regjistra të certifikuar dhe të miratuar.
4. E burgosura ose një person i autorizuar prej tij, mund t'i kërkojë Drejtorit të Institucionit të njihet me të dhënat personale të tij, pasi i deklaron drejtorit shkakun dhe llojin e informacionit që i duhet. Drejtori i Institucionit duhet të sigurohet që informacioni i dhënë nuk lidhet me një të burgosur tjetër.
5. Në rast se informacioni kërkohet nga një person i tretë, për dhënien e tij duhet marrë në parë pëlqimi me shkrim i të burgosurës, përveç rasteve kur parashikohet ndryshe nga dispozitat ligjore në fuqi.

Neni 58

Mjetet monetare

1. E burgosura lejohet të depozitojë mjete monetare në llogari personale në një institucion bankar. Në rastin e hapjes së llogarive në një institucion bankar, marrëdhëniet midis institucionit bankar dhe IEVP-së rregullohen me marrëveshje të përbashkëta, ku parashikohet mënyra e deponimit dhe përdorimit të mjeteve monetare nga të burgosurit.
2. Mjetet monetare përdoren nga të burgosurit për blerje të sendeve, të cilat lejohen nga kjo rregullore.
3. Të burgosurat kanë të drejtë t'i dërgojnë mjete monetare familjes.
4. Ndalohet kategorikisht, administrimi i parave në dorë (cash), nga të burgosurat brenda ambienteve të banimit. Paratë e gjetura tek të burgosurat, do të trajtohen si send i ndaluar dhe pasi sekuestrohen kalojnë në kartotekën e institucionit në sektorin ligjor.
5. Pas lirimit, të burgosurave u kthehen të gjitha paratë e mbetura në kartotekën e institucionit.
6. Paratë e depozituara në llogarinë e të burgosurave përdoren prej tyre për realizimin e nevojave për blerjen e artikujve ushqimorë, veshmbathjeve e sendeve të tjera.
7. Çdo e burgosur ka të drejtë që nga llogaria e tij vetjake t'i dërgojë familjes ose të afërmeve, nëpërmjet postës, ose duke ua dhënë familjarëve kur vijnë për takim, nëpërmjet një dokumenti të firmosur nga i burgosuri dhe personi që i tërheq paratë. Kjo sasi lekësh do të zbritet nga llogaria personale e tij.
8. Të dënuarat në institucionin e hapur, mund të shkojnë në një institucion bankar për të kryer veprime bankare (hapje llogarie, apo t'i dërgojë dhe depozitojë para familjes ose të afërmeve), nëpërmjet bankës, i shoqëruar nga punonjës të institucionit nëpërmjet një autorizimi të konfirmuar nga drejtori i institucionit.

KREU VII KONTAKTET ME BOTËN E JASHTME

Neni 59

Takimi me familjen, të afërmit dhe rrethin shoqëror

1. Të burgosurat kanë të drejtë të takohen të paktën katër herë në muaj me anëtarët e familjes, ose me persona të ndryshëm nga anëtarët e familjes së tyre.
2. Të miturat kanë të drejtë:
 - a. të kenë 8 vizita nga familjarë/rrethi shoqëror dhe si motivim nxitës 2 vizita shtesë në muaj. Në rast pamundësie të familjarëve dhe rrethit shoqëror për të kryer vizitat në orën e parashikuar, nga titullari i institucionit, për të bërë të mundur garantimin e së drejtës për takim në një kohë të përshtatshme për ta dhe të miturën;
 - b. të kenë 4 vizita në vit pranë familjes dhe si motivim vizita shtesë;
 - c. të kenë të paktën 1 vizitë në rastet e problemeve shëndetësore ose emocionale; të takohen tetë herë në muaj me anëtarët e familjes, ose me persona të ndryshëm nga anëtarët e familjes së tyre dhe si motivim nxitës 2 vizita shtesë në muaj.
3. Familja dhe rrethi shoqëror, në rast se kërkojnë kontakt me të miturën, paraqesin kërkesë pranë institucionit. Në çdo rast merret pëlqimi i të miturës për realizimin e kontaktit.
4. Kohëzgjatja e takimit është të paktën 1 (një) orë.
5. Të paraburgosurat lejohen të takohen me anëtarët e familjes, ose me persona të ndryshëm nga anëtarët e familjes vetëm me miratim nga prokurori i çështjes.
6. Kur organizimi i institucionit e lejon, e burgosura mund të qëndrojnë me familjarët përtej kufirit kohor të parashikuar. Vizitat zhvillohen në ambiente të veçanta nën mbikëqyrjen e personelit të institucionit, sipas rregullave të përcaktuara në rregulloren e përgjithshme të burgjeve.
7. Për vizitat që zhvillohen nga fëmijët e tyre, mundësohen takime më të shpeshta deri 6 herë në muaj.
8. Drejtori i institucionit mund të japë takime shtesë të arsyetuara për të burgosurat, ose bashkim takimesh.
9. Takimet e zgjatura lejohen 1 herë në muaj dhe jo më shumë se 4 orë për të dënuarat e martuara ose bashkëjetuese, në përputhje me kriteret e përcaktuara në Kodin e Familjes, pasi bashkëjetesa e tyre të jetë verifikuar nga Policia e Shtetit.
10. Takimet do të zhvillohen çdo ditë ora 07:30 -15:00 dhe ditën e shtunë vetëm për raste të veçanta të argumentuara (caktime me vendime gjyqate për takim të fëmijëve) nga ora 09:00-13:00. Regjistrimet e takimeve do të kryhen nga ora 07.00 deri 14.00.
11. Në çdo takim, lejohen fëmijët e mitur dhe tre persona madhorë.
12. Të burgosurat kanë të drejtë të zëvendësojnë 1 (një) vizitë fizike me atë online. (Komunikim me videocall)
13. Drejtori i Institucionit, me vendim të prokurorit apo të gjykatës, kufizon të drejtën e të burgosurës që të presë vizita, nëse kjo është e nevojshme për kryerjen e veprimeve procedurale penale.
14. Familjarët dhe të afërmit duhet të jenë të pajisur me dokument identifikimi, i cili provon lidhjen me të burgosurën.

15. Me miratimin e Drejtorit të institucionit, kur shihet e arsyeshme, mund të takohen me të burgosurin edhe persona të tjetër që nuk përfshihen në pikën 1 të këtij neni.
16. Takimet kryhen në vendin e caktuar për kryerjen e takimeve të zakonshme.
17. Për nënat të cilat kanë fëmijë deri në 18 vjeç, dhe fëmijët e tyre ndodhen jashtë Shqipërisë në kushtet kur e kanë të pamundur të realizojnë takime me to, lejohet komunikimi online në adresën zyrtare të institucionit e hapur për këtë qëllim, deri në dy herë në muaj me kohëzgjatje deri në 60 minuta. Ky proces realizohet në ambientin e takimeve me familjarë, monitorohet nga stafi i kujdesit social dhe punonjësi i vëzhgimit të takimeve.

Neni 60

Procedurat për vizitat me anëtarët e familjes ose të afërmit

1. Vizitat e të burgosurës, me anëtarët e familjes, apo të afërmit bëhen me rezervim paraprak në platformën e-albania, ose me planifikim nëpërmjet kërkesës së të burgosurës apo familjarëve.
2. Jo më vonë se 24 (njëzet e katër) orë përpara vizitës, e burgosura rezervon takimin me familjarët apo të afërmit. Rezervimi mund të bëhet nga vetë e burgosura, anëtarët e familjes, ose nga persona të ndryshëm nga anëtarët e familjes.
3. Me kryerjen e rezervimit të takimit nga e burgosura, anëtari i familjes ose personat e ndryshëm nga anëtarët e familjes, verifikohet identiteti i personit, bëhet verifikimi i numrit të takimeve në regjistrin e indeksit alfabetik dhe më pas bëhet regjistrimi në regjistrin e takimeve të të burgosurave me familjarët.
4. Më pas, njoftohet përgjegjësi i regjimit të brendshëm, i cili lajmëron të burgosurin mbi ardhjen e familjarëve apo të afërmeve/personave të ndryshëm nga anëtarët e familjes dhe merr masa për organizimin e takimit.
5. Personat vizitorë para takimit i nënshtrohen kontrollit fizik. Këtij kontrolli i nënshtrohet edhe pako që ka me vetë vizitori. Kontrolli i ushqimeve dhe i sendeve, bëhet nga kontrollorët në prezencë të oficerit të informacionit.
6. Shoqërimi i vizitorit nga dhomat e kontrollit deri në dhomën e takimit do të bëhet nga punonjës të rolit bazë në detyrë.
7. Shoqërimi i të burgosurës nga vendi i banimit për në dhomën e takimit bëhet nga punonjësi i rolit bazë, pasi është kontrolluar më parë e burgosura.
8. Në rast se gjatë zhvillimit të takimit konstatohen shkelje e rregullave, pezullohet takimi, veçohet e burgosura dhe largohen familjarët.
9. Çdo familjar pas mbarimit të takimit i nënshtrohet kontrollit para daljes nga ambientet e regjimit të brendshëm.
10. Pas largimit të vizitorit, të burgosurës i bëhet kontrolli nga punonjësi i rolit bazë, në praninë të përgjegjësit, i cili e shoqëron pas kontrollit për në dhomën e banimit.
11. Në rastet kur konstatohet se nga vizitorët tentohet të futen sende të ndaluara që i posedojnë vetë, pezullohet takimi dhe ndiqen procedurat ligjore, njoftohet prokuroria, ndalohet personi dhe bëhet kallëzim penal.
12. Kur vizitori tenton të fusë sende të ndaluara, Drejtori i institucionit vendos moslejimin e takimeve për këtë vizitor për një periudhë nga 3 deri në 6 muaj.

Neni 61

Vëzhgimi i takimeve

1. Takimet zhvillohen në vendet e caktuara nën mbikëqyrjen vizuale të personelit mbikëqyrës.
2. Në rast se personeli mbikëqyrës i policisë konstaton se vizitorët tentojnë, apo kryejnë shkëmbime sendesh të ndaluara me të burgosurin, ndërpret menjëherë takimin dhe njofton Specialistin e Informacionit.
3. Pas përfundimit të kohës së takimit, personeli mbikëqyrës njofton specialistin e informacionit për shoqërimin e të burgosurit në regjimin e brendshëm dhe për shoqërimin dhe daljen e vizitorëve nga institucioni.

Neni 62

Ndalimi i vizitave

Drejtori i institucionit të ekzekutimit të vendimeve penale është kompetent për të ndaluar vizitat për shkaqe të justifikueshme.

Neni 63

Shkaqet e ndalimit të vizitave të përkohshme për vizitorët

1. Shkaqet e ndalimit të vizitave janë:
 - a. Në rast të informacioneve se e burgosura apo vizitori gjatë realizimit të vizitës mund të rrezikojë sigurinë e institucionit apo të vizitorëve.
 - b. Në rast të informacioneve për planifikim ose të kryerjes së ndonjë vepre penale;
 - c. Në rast se vizitori bënë përpjekje që të fusë sende të ndaluara në institucion;
 - d. Vizitat që paraqesin kërcënim për shëndetin fizik dhe mental për të burgosurën dhe vizitorin;
 - e. Në çdo rast tjetër që mund të paraqes rrezik për institucionin apo vizitorët.
2. Drejtori i institucionit të ekzekutimit të vendimeve penale me vendim përcakton kohëzgjatjen për ndalimin e vizitës varësisht prej shkaqeve për të cilat është ndaluar.
3. Drejtori i institucionit të ekzekutimit të vendimeve penale duhet ta informojë të burgosurën dhe vizitorin për arsye e ndalimit të vizitës.
4. Ndalimi i vizitës nuk konsiderohet masë disiplinore.

Neni 64

Ndërprerja e përgjithshme e vizitave

1. Drejtori i institucionit të ekzekutimit të vendimeve penale pasi njofton Drejtorin e Përgjithshëm të Burgjeve, bën ndërprerjen e përgjithshme të vizitave për të gjithë të burgosurat kur siguria e institucionit është e rrezikuar dhe nëse nuk ka alternativë tjetër kufizuese në dispozicion.
2. Ndërprerja e përgjithshme e vizitave duhet të vazhdojë përderisa vazhdon rreziku.
3. Në rast të shfaqjes së ndonjë sëmundje epidemiologjike në vend, me qëllim parandalimin e përhapjes të saj, drejtori i institucionit të ekzekutimit të vendimeve penale në koordinim me Drejtorin e Përgjithshëm bën ndalimin e vizitave të përkohshme.

Neni 65

Bisedat telefonike

1. Të burgosurave ju lejohet të komunikojnë në telefon me anëtarë të familjes, të afërmit dhe në raste të veçanta me të tretë. Të dënuarat e sigurisë së ulët dhe gratë e dënuara dhe të paraburgosura, kanë të drejtë të komunikojnë në telefon 16 herë në muaj. Të dënuarat e burgut të hapur kanë të drejtë të komunikojnë në telefon 20 herë. Çdo telefonatë duhet të zgjasë jo më shumë se 15 minuta.
2. Në rastet kur e burgosura dhe e mitura nuk kanë mjete financiare për të kryer biseda telefonike me familjarët, kjo e fundit i sigurohet 4 (katër) herë në muaj deri në 5 (pesë) minuta me shpenzimet e institucionit ose me komunikimin online (videocall)
3. Të kryejë 4 videokonferenca në muaj dhe si motivim nxitës 2 videokonferenca shtesë në muaj.
4. Drejtori i institucionit mund të lejojë kryerjen e bisedave telefonike shtesë, kur e vlerëson të nevojshme në funksion të mirëqenies psiko sociale dhe mbajtjes së lidhjeve me familjen.
5. Të burgosurat duhet të deklarojnë numrat e telefonit dhe poseduesit e tyre tek stafi i shërbimit social ose oficeri i kontaktit i cili koordinon punën me operatorin me qëllim regjistrimin e numrave të konfirmuar, në sistemin PIN. Të burgosurat nuk mund të flasin me një numër telefoni, i cili nuk është deklaruar tek stafi.
6. Të burgosurat kanë të drejtë me ardhjen në Institucion të flasin për të informuar mbi vendndodhjen e tyre të familjarëve dhe të afërmeve me dy numër telefoni që nuk nevojitet vërtetimi. Për hapjen e numrave të tjerë (deri 15) nevojitet detyrimisht vërtetimi.
7. Bisedat telefonike zhvillohen nën mbikëqyrjen vizuale të personelit.
8. Drejtori i institucionit, me vendim të prokurorit ose gjykatës, kufizon të drejtën e të burgosurit për biseda telefonike.
9. Nëse i burgosuri abuzon me rregullat për zhvillimin e bisedave telefonike, thirrja ndërpritet nga punonjësi mbikëqyrës.

Neni 66

Takimet e të burgosurave me shtetësi të huaj me përfaqësitë diplomatike

1. Të burgosurat me shtetësi të huaj i krijohen të gjitha lehtësitë e nevojshme për komunikimin me përfaqësuesit diplomatikë, ose konsullorë të shtetit përkatës.
2. Të burgosurat, shteti i të cilit nuk ka përfaqësi diplomatike në Republikën e Shqipërisë, refugjatëve, si dhe personave pa shtetësi, u krijohen të njëjtat lehtësira për të komunikuar me përfaqësuesit diplomatikë të shtetit që merr përsipër mbrojtjen e interesave të tyre, ose me autoritetet kombëtare, apo ndërkombëtare që kanë për objekt të veprimtarisë së tyre mbrojtjen e interesave të këtyre personave.
3. Përfaqësuesit diplomatikë dhe konsullorë kanë të drejtë të zhvillojnë takime në çdo kohë me shtetasit e tyre të burgosur, me njoftimin paraprak të institucionit.

KREU VIII
TAKIMET ME GJYQTARË, PROKURORË, AVOKATË DHE INSTITUCIONE TË
TJERA

Neni 67

Takimet me prokurorë, avokatë ose oficerë të policisë gjyqësore

1. Gjyqtarët, prokurorët dhe oficerët e policisë gjyqësore të autorizuar lejohen të takohen në dhomën e takimit në regjimin e brendshëm për të zhvilluar veprime procedurale me të burgosurat.
2. Avokatët lejohen të marrin takim me të burgosurat, kundrejt aktit të përfaqësimit brenda orarit zyrtar.
3. Takimet e gjyqtarit, prokurorit, oficerit të policisë gjyqësore, lejohen në çdo kohë.
4. Për të miturat; Referuar pikës 3 të nenit 77 të Kodit Penal Për të Miturit, si garanci procedurale, ndalohet marrja në pyetje e të miturës gjatë natës nga ora 22.00-08.00.
5. Të burgosurat kanë të drejtë të zhvillojnë takime në çdo kohë me përfaqësuesin e tyre ligjor, me njoftimin paraprak të institucionit.

Neni 68

Takimet me Avokatin e Popullit

1. Avokati i Popullit takohet me të burgosurat, në çdo kohë, pa njoftimin paraprak të institucionit.
2. Takimi i të burgosurave me Avokatin e Popullit nuk mbikëqyret.

Neni 69

Takimet me noterët dhe punonjësit e gjendjes civile

1. Të burgosurat lejohen të takohen me noterin e zgjedhur për kryerjen e veprimeve ligjore brenda orarit zyrtar.
2. Të burgosurat shoqërohen në zyrën e gjendjes civile për lidhje martese apo për aplikimin për kartë identiteti ose pasaportë ose çdo veprim të ligjshëm në kompetencë të kësaj zyre, brenda orarit zyrtar.

KREU IX

REHABILITIMI, PËRGATITJA PËR LIRIM DHE RIINTEGRIM

Neni 70

Programet rehabilituese

1. Programet e rehabilitimit synojnë aftësimin social të të burgosurve përmes marrjes së njohurive të reja dhe zhvillimit të aftësive pro-socile, me qëllim minimizimin e riskut të sigurisë dhe parandalimin e mundësive për recidivizëm.
2. Programet rehabilituese përfshijnë programet e aftësive për jetën, programe terapeutike për shëndetin mendor, programe të arsimimit, formimit profesional, punësimit etj.
3. Pjesëmarrja në programe rehabilituese bëhet pas një vlerësimi të kujdeshshëm të riskut dhe nevojave kriminogjene të të burgosurës.

4. Administrata zhvillon një vlerësim të kujdesshëm për të përcaktuar nëse e burgosura paraqet rrezik për dëmtimin e vetes, apo të burgosurve të tjerë, personave që punojnë në burg, ose që vizitojnë burgun, ose komunitetit, dhe mundësinë për t'u arratisur ose për të kryer një krim tjetër të rëndë ndërkohë që është me leje nga burgu, ose e liruar.
5. Vlerësimi fillestar i rrezikut dhe i nevojave duhet të kryhet nga një personel i trajnuar në mënyrë të përshtatshme dhe mundësisht të zhvillohet në një qendër vlerësimi.
6. Për të burgosurat e mitura që i përkasin minoriteteve etnike dhe gjuhësore, të huajt dhe personat pa shtetësi, për aq sa është e mundur, mundesohen programe që respektojnë kulturën e tyre me qëllim rehabilitimin e tyre në kohë sa më të shpejtë dhe me efektivitet.
7. Për realizimin e rehabilitimit social dhe riintegritit të të burgosurve, institucioni duhet të verë në dispozicion të gjitha burimet e përshtatshme, duke realizuar përkrahjen morale, kualifikimin profesional, arsimimin, edukimin fizik, zhvillimin e aftësive shoqërore, këshillimin, pjesëmarrjen në aktivitete të përbashketa për të miturën dhe nxitjen e kontakteve me jashtë, në mënyrë që të zgjerohet perspektiva e riintegritit shoqëror pas lirimit.
8. Trajtimi i grupeve të veçanta të të burgosurave përfshi dhe kategorinë e të miturave bëhet nga një personel i trajnuar për këto kategori.
9. Me qëllim rehabilitimin e të miturve hartohet plani individual i trajnimit, i cili bëhet duke vlerësuar nevojat individuale psikologjike, shoqërore, gjinore, moshën, gjendjen shëndetësore, orientimin seksual ose identitetin gjinor, situatën kulturore dhe ekonomike, mjedisin ku ka jetuar e mitura, veprën penale dhe faktorët e riskut, si dhe motivimin për tu përfshirë në veprimtaritë që organizohen në institucion.
10. Plan i përfshin, këshillim, terapi, edukim, arsimim, formim profesional, punësim, shërbim bibliotekar, si dhe çdo shërbim tjetër të nevojshëm.
11. Punonjësi i shërbimit social diskuton me të miturën e burgosur planin dhe programin e individualizuar, dhe bën rivlerësimin dhe ndryshimin në përputhje me ecurinë e trajtimit.

Neni 71 Individualizimi i trajtimit

1. Personeli i shërbimit social vlerëson personalitetin e të burgosurave, me qëllim identifikimin e nevojave psikologjike e sociale, aftësinë dhe vullnetin e të burgosurës për punë e formim profesional. Në bazë të rezultatit të vëzhgimit dhe të të dhënave personale, familjare, shoqërore, të masës së dënimit, personeli i kujdesit social harton planin e ri-integritit për çdo të burgosur dhe programin e individualizuar të trajtimit për grupe të veçanta, i cili përgatitet nga një grup specialistësh, i përbërë nga psikologë, punonjës socialë dhe edukatorë. Plan i ri-integritit përfshin këshillim, terapi, edukim, arsimim, formim profesional, punësim, shërbim bibliotekar, si dhe çdo shërbim tjetër të nevojshëm.
2. Punonjësia e shërbimit social evidenton të dhënat e grumbulluara nga vëzhgimi, trajtim individual, si dhe nga sjellja gjatë gjithë periudhës së burgimit, të përfshira në dosjen psiko-sociale të të burgosurit.
3. Punonjësia e shërbimit social diskuton me të burgosurën planin e ri-integritit dhe programin e individualizuar dhe bën rivlerësimin dhe ndryshimin në përputhje me ecurinë e trajtimit.
4. Rëndësi e veçantë i kushtohet trajtimit psiko-social të të burgosurve të mitur, grup moshës 18 deri 21 vjeç, grave, personave me çrregullime të shëndetit mendor, të pasura ose të fituara gjatë burgimit, personave me aftësi të kufizuara, personave me orientim seksual të ndryshëm, personave me sëmundje kronike ose të varur nga droga, të moshuarave,

personave të dënuar me dënime afatgjata, personave që i përkasin minoriteteve etnike ose gjuhësore, shtetaseve të huaj dhe personave pa shtetësi.

5. Planifikimi individual për menaxhimin e dënimit afatgjatë të të burgosurës duhet të ketë si qëllim zhvillimin progresiv në sistemin e burgjeve.
6. Vëzhgimi, programimi dhe realizimi i trajtimit bëhen nga administrata e institucionit me anë të personelit të vet, në bashkëpunim me organet dhe institucionet shtetërore përkatëse.
7. Kontributi i organizatave jofitimprurëse dhe individëve të veçantë nxitet dhe mbështetet nga administrata në realizimin e programit të trajtimit.

Neni 72

Prindërimi në distancë

1. Prindërimi në distancë synon forcimin e marrëdhënieve me familjen dhe përgatitjen për ri-integrim me përqëndrim të veçantë tek të miturit dhe gratë.
2. Në institucion krijohen mjedise të veçanta, të përshtatura për zbatimin e këtij programi, ku të burgosurit shpenzojnë deri në 4 orë për takimet që realizojnë me fëmijët të moshës deri në 18 vjeç.
3. Prindërim në distancë me miratim të drejtorit të institucionit mund të realizojnë edhe familjarët e të burgosurve që janë të moshuar dhe me probleme shëndetësore.

Neni 73

Pjesëmarrja në aktivitete dhe veprimtari kulturore, çlodhëse e sportive

1. Procesi i edukimit përfshin edhe programe të trajtimit në grup të të burgosurve, duke u dhënë mundësi atyre të marrin pjesë në aktivitete të ndryshme të institucionit, të cilat i ndihmojnë të zhvillojnë ndjenjën e përgjegjësisë, vetëbesimit, si dhe të nxisin interesin për arsimim, formim profesional, veprimtari kulturore, çlodhëse e sportive, punë etj.
2. Administrata bashkëpunon me institucionet e tjera, organizatat jofitimprurëse e ato fetare për organizimin e veprimtarive kulturore, krijuese dhe sportive, brenda dhe jashtë institucionit.
3. Institucioni organizon veprimtari me karakter social çdo muaj. Data dhe koha e aktiviteteve sociale përcaktohet nga Drejtori i institucionit. Ndjekja e këtyre aktiviteteve është e lirë. Të vetmet lojëra të lejuara janë lojërat që nuk vënë në rrezik rendin, rregullin dhe sigurinë në dhoma dhe në gjithë institucionin. Aktivitetet sportive janë të lejuara vetëm në vendet për këtë qëllim.
4. Përdorimi i dhomave dhe ambienteve çlodhëse përcaktohet me urdhër të Drejtorit të institucionit.
5. Mbajtja e materialeve për punë artizanale realizohet vetëm me marrjen e lejes. Puna artizanale që rrezikon rregullin e sigurinë në institucion.
6. Zhvillimi i aktiviteteve sportive me kërkesë të të burgosurve, jashtë programit të institucionit bëhet vetëm me leje të Drejtorit të Institucionit.

Neni 74

Arsimimi

1. Të burgosurat që nuk e kanë përfunduar arsimin 9-vjeçar i krijohen kushte për përfundimin e tij, me anë të një programi të veçantë, të miratuar nga Ministria e Arsimit, bazuar në ak marrëveshjes midis Ministrisë së Arsimit me Ministrinë e Drejtësisë. Pjesëmarrja dhe

- ecuria e mirë e të burgosurit në një program mësimor shënohet si tregues i pozitiv në vlerësimin periodik apo me objekt.
2. Mësimdhënia realizohet nga mësues të miratuar nga Drejtoritë Rajonale Arsimore. Në përfundim, e burgosuri pajiset me dokumentin që vërteton përfundimin e arsimimit dhe rezultatet e tij, duke mos e cilësuar vendin e vuajtjes së dënimit.
 3. E burgosura nxitet të marrë pjesë për arsimimin në nivele më të larta brenda dhe jashtë institucionit. Për të burgosurit që studiojnë në nivelin 9-vjeçar dhe të mesëm, institucioni merr përsipër mbulimin e shpenzimeve për arsimim.
 4. Çdo e burgosur që është e mitur dhe është subjekt i arsimit të detyrueshëm i sigurohet arsimimi, në përputhje me rregullat e parashikuara në Kodin e Drejtësisë Penale për të Mitur, legjislacionin për trajtimin e të dënuarve dhe të paraburgosurve, si dhe akteve nënligjore të nxjerra në zbatim.
 5. Për të dënuarat me gjysmëliri që duan të ndjekin studimet universitare apo pasuniversitare, shpenzimet mbulohen nga vetë e dënuara.

Neni 75

Kurset profesionale

1. Drejtoria e Institucionit të Ekzekutimit të Vendimeve Penale nxit dhe krijon kushtet për formimin profesional brenda dhe jashtë institucionit. Trajnimi në këto kurse realizohet nga profesionistë sipas Marrëveshjes së përbashkët me Ministrinë e Ekonomisë dhe Financës.
2. Kujdes i veçantë i kushtohet formimit kulturor dhe profesional të të burgosurave me moshë nën 25 vjeç.
3. Të burgosurat që i përkasin minoriteteve etnike ose gjuhësore, që nuk e kuptojnë, ose zotërojnë gjuhën shqipe dhe të dënuarve të huaj u mundësohen materiale të shkruara në gjuhën e tyre, ose në një gjuhë që e kuptojnë më mirë.
4. E burgosura nxitet për frekuentimin e kurseve të formimit profesional.

Neni 76

Puna e të burgosurave

1. Puna e kryer nga e burgosura shpërblehet sipas parashikimit të Vendimit të Këshillit të Ministrave Nr.602, datë 13.10.2021 "Për përcaktimin e rregullave të posaçme për punësimin e të burgosurve, kushtet e punës, kohëzgjatjen dhe shpërblimin e saj".
2. E burgosura ka të drejtën e një shpërblimi mujor për punën e tij. Shpërblimi për secilën kategori caktohet në vlerë të drejtë në proporcion me sasinë dhe cilësinë e punës së kryer sipas Vendimit të Këshillit të Ministrave Nr.602, datë 13.10.2021 "Për përcaktimin e rregullave të posaçme për punësimin e të burgosurve, kushtet e punës, kohëzgjatjen dhe shpërblimin e saj".
3. Punësimi i të burgosurës ka si qëllim të garantojë fitimin, ruajtjen dhe zhvillimin e aftësive për punë dhe njohurive profesionale, për riintegrim në shoqëri, pas përfundimit të kryerjes së dënimit.
4. Aktet ligjore dhe nënligjore që shërbejnë për mbrojtjen e shëndetit dhe sigurisë në punë, mirëqënies sociale dhe kohëzgjatjen e punës, si dhe ato që rregullojnë marrëdhëniet e punës, me përjashtim të ushtrimit të së drejtës për grevë dhe pjesëmarrje në sindikata, zbatohen njëjloj edhe për të burgosurat.
5. Të burgosurat e angazhuar në punë i sigurohen materiale dhe pajisje sipas normave të caktuara, të cilat administrohen nga magazinieri i burgut. Për materiale që janë sende të

ndaluar dhe të nevojshme për punën e tyre, administrimi bëhet nga specialisti informacionit.

6. E burgosura e cila është angazhuar në punë duhet të sillet në mënyrë të përgjegjshme dhe profesionale për punën që i ngarkohet, duke respektuar urdhrat që i jepen dhe është e detyruar të ruajë edhe të mirëmbajtje të gjithë bazën materiale që ka në ngarkim. Për çdo shkelje të rregullit të mësipërm, për humbjen dhe dëmtimin nga pakujdesia dhe me qëllim të mjeteve të punës, e burgosura është detyruar ta zhdëmtojë atë.
7. Rregulla të posaçme për punësimin e të burgosurve, kushtet e punës dhe kohëzgjatjen e saj, janë përcaktuar me Vendimin e Këshillit të Ministrave Nr.602, datë 13.10.2021 "Për përcaktimin e rregullave të posaçme për punësimin e të burgosurve, kushtet e punës, kohëzgjatjen dhe shpërblimin e saj" dhe në urdhrin përkatës të DPB.
8. Personeli i institucionit të ekzekutimit të vendimeve penale, nxit, motivon dhe mbështet të burgosurën për punësim dhe vetëpunësim, duke vlerësuar aftësitë profesionale të tyre.
9. Për rastet e punësimit jashtë institucionit të ekzekutimit të vendimeve penale, personeli kryen një vlerësim të detajuar të vendit të punës, kushteve materiale, pozicionit ku ndodhet qendra e punës, përbërjen e të punësuarve, rrisqe për sigurinë e publikut, gatishmërinë për të pranuar dhe mbështetur të burgosurën e punësuar, transportin, distancën e etj.

Neni 77

Punësimi i të dënuarave jashtë institucionit

1. Të dënuarat e pranuar në institucionin e hapur kanë të drejtë të punësohen brenda dhe jashtë institucionit.
2. Punësimi jashtë institucionit, mund të sigurohet:
 - a) Nga vetë e dënuara;
 - b) Ose nga institucioni, nëpërmjet bashkëpunimit me subjektet përkatëse;
3. Në rastet kur puna gjendet nga vetë e dënuara, kontrata e punës nuk konsiderohet automatikisht e vlefshme.
4. Kontrata e punës duhet t'i vihet në dispozicion komisionit të punësimit të institucionit, i cili më pas bën verifikimet përkatëse dhe vendos për vlefshmërinë dhe miratimin e saj. Pas miratimit, mund të bëhet nënshkrimi i kontratës dhe e dënuara mund të fillojë punën jashtë institucioni.

Neni 78

Monitorimi në ambientin e punës jashtë institucionit

1. Të dënuarat që janë të punësuar jashtë institucionit, në ditët e para të punës, do të shoqërohen nga punonjësia e policisë (veshur civile).
2. Në ditët në vijim, të dënuarat do të kontrollohen herë pas here nga punonjësia i institucionit, në mënyrë që të verifikohet prania e tyre në vendin e punës.
3. Punonjësia e institucionit ka të drejtë të kontaktojë të dënuarën ose punëdhënësin e saj, për të verifikuar praninë e të dënuarës në ambientet e punës.
4. Nëse gjatë monitorimit konstatohet se kontrata është vetëm fiktive dhe e dënuara nuk kryen detyrat e përcaktuara në të, punonjësia e institucionit do të do të mbajë një procesverbal që do i vihet në dispozicion drejtorit të institucionit, dhe komisionit të punësimit. Nëse konfirmohet kjo shkelje, kontrata e punës do të zgjidhet menjëher.

Neni 79

Plotësimi i nevojave fetare

1. Të burgosurat kanë të drejtë të marrin pjesë në aktivitete fetare si lutje, falje, festë etj., por nuk mund të drejtojnë këto aktivitete.
2. Drejtimi i faljeve, lutjeve dhe aktiviteteve fetare duhet të kryhet nga përfaqësues i Komiteteve Fetare, zyrtarë i autorizuar prej tyre dhe i verifikuar nga ana e institucioneve të sigurisë.
3. Gjatë zhvillimit të aktiviteteve fetare si nën pikën 4 të këtij neni, nuk lejohet bashkimi i të dënuarave të sigurisë së lartë me të dënuara të niveleve të tjera të sigurisë dhe as të dënuara të identifikuar me sjellje të dhunshme dhe me rrezik për të tjerët.
4. Nëse në institucionin nuk ekziston ambient i veçantë për plotësimin e nevojave fetare të burgosurës për zhvillimin e ceremonisë fetare (lutjen) mund ta kryejë në dhomë.
5. Gjatë zhvillimit të aktiviteteve fetare nuk duhet të prishet rendi, disiplina dhe siguria e përgjithshme në institucionin korrektues, as të fyhet ndjenja fetare ose nacionale e të burgosurit.
6. Të dënuarat e dënuar me gjysëmliri dhe ato të akomoduar në institucionin e hapur, kanë të drejtë të ndjekin ritet fetare në institucionet fetare (kishë, xhami, etj), me leje/autorizim të drejtorit të institucioni

Neni 80

Shërbimi bibliotekar

1. Në Institucionin e Ekzekutimit të Vendimeve Penale nxitet dhe inkurajohet leximi i librave, nëpërmjet funksionimit të shërbimit të bibliotekës.
2. Shërbimi i bibliotekës organizohet dhe mbikëqyret nga sektori i çështjeve shoqërore, i cili kujdeset për mirëmbajtjen dhe pasurimin e saj, si dhe shpërndarjen e literaturës.
3. Në përzgjedhjen e literaturës duhet të mbahet parasysh siguri sa më e mirë e nivelit shkencor, kulturor dhe artistik.
4. Favorizohet leximi pa kufizim i botimeve dhe përdorimi i sistemeve të tjera informative të bibliotekës së institucionit.
5. Biblioteka e institucionit duhet të ketë literaturë për të drejtat dhe trajtimin e të paraburgosurve dhe të dënuarve, legjislacionin bazë penal, procedural penal dhe në fushën e trajtimit të të burgosurve.
6. Çdo e burgosur ka të drejtë të anëtarësohet në bibliotekë dhe tërheqja e librave bëhet nëpërmjet kartelave personale të tyre.
7. Në bibliotekë realizohet leximi i librave dhe i shtypit të përditshëm nga të burgosurit.
8. Çdo e burgosur mund të tërheqë 1 deri në 3 libra njëherësh.
9. Koha e kthimit të librave është deri në 2 (dy) javë nga dita e marrjes.
10. Lexuesi mund të paraqitet në bibliotekë për të kërkuar shtyrje të afatit.
11. Libri që merret nga biblioteka duhet të mbahet me kujdes. Përpara marrjes së librit në dorëzim, lexuesi këshillohet ta kontrollojë atë. Në rast dëmtimi të librit, ose humbje, libri do të zhdëmtohet nga lexuesi që e ka në ngarkim.
12. Nuk lejohet shkëmbimi i librave midis të burgosurve, si dhe të marrin librat në vendin e tyre të punës.
13. Në raste lirimesh, transferimesh, e burgosura duhet ta dorëzojë personalisht librin në bibliotekë përpara momentit të largimit nga institucioni.

Neni 81

Përgatitja për liri dhe riintegrim

1. Plani e përgatitjes për liri (para-lirimit) hartohen jo më vonë se 6 muaj përpara lirimit të të burgosurës.
2. Për të gjithë të burgosurat e liruar duhet të ketë një plan të veçantë. Ky plan merr parasysh shkallën e nevojave dhe rreziqeve të tyre që janë adresuar gjatë kohës në burg, si dhe rekomandimet për ndërhyrje të ardhshme, jep sugjerime për parandalimin e kryerjes së veprave të tjera penale pas lirimit nga burgu, si dhe nevojën për t'i referuar në shërbime të komunitetit apo në agjensi mbështetëse.
3. Përgatitja për riintegrim fillon gjatë kryerjes së dënimit e vijon dhe pas lirimit nga institucioni i ezekutimit të vendimeve penale.
4. Institucioni, në bashkëpunim me qendrën e Parandalimit të Krimeve të të Miturve dhe të Rinjve, Shërbimin e Proves, punonjesit e Mbrotjes së fëmijës, institucionet vendore dhe organizatat jofitimprurese hartojnë programe riintegrimi për të miturit në prag lirimi.
5. Bashkëpunimi me institucione dhe agjensive të ndryshme përbën një element kyç për riintegrimin e sigurtë dhe të suksesshëm të çdo të burgosur në shoqëri.

Neni 82

Komisioni i vlerësimit të sjelljes

1. Komisioni i vlerësimit të sjelljes së të burgosurave ngrihet me urdhër të Drejtorit të institucionit.
2. Komisioni i vlerësimit të sjelljes kryesohet nga përgjegjësi i sektorit ligjor dhe përbëhet nga katër anëtarë:
 - a. Përgjegjësi i sektorit të çështjeve shoqërore;
 - b. Specialisti i sektorit të çështjeve shoqërore të grupit;
 - c. Përgjegjësi i sektorit të sigurisë;
 - d. Specialisti i regjimit të brendshëm.

Neni 83

Vlerësimi i sjelljes së të burgosurave

1. Komisioni i vlerësimit të sjelljes, harton vlerësimin e sjelljes për çdo të burgosur, si më poshtë:
 - a. çdo 6 muaj dhe vlerësimi protokollohet dhe administrohet në dosjen psiko-sociale dhe në dosjen penale.
 - b. për seancat gjyqësore me objekt uljen e dënimit, pasqyrohen të gjitha masat disiplinore të dhëna ndaj saj për vitin e fundit të vuajtjes së dënimit.
 - c. për seancat gjyqësore me objekt lirimin me kusht ose ndryshimin e klasifikimit të sigurisë, pasqyrohen të gjitha masat disiplinore të dhëna ndaj të dënuarës gjatë 2-viteve të fundit të vuajtjes së dënimit.
2. Në çdo rast transferimi nga një institucion/seksion në tjetrin, shoqërohet me vlerësimin e sjelljes, i cili administrohet në dosjen personale.
3. Vlerësimi i sjelljes për transferim përfshin periudhën nga vlerësimi 6 mujor i fundit.

KREU X

DISIPLINA E TË BURGOSURVE

Neni 84
Rregullat e sjelljes

1. Të burgosurat gjatë gjithë kohës së vuajtjes së dënimit duket të respektojnë rregullat dhe detyrimet e përcaktuara në legjislacionin në fuqi dhe në programin e trajtimit të tyre, rendit dhe qetësinë në institucion si dhe të sillen me korrektësi dhe përgjegjshmëri.
2. Të burgosurat duhet të zbatojnë me vetëdije dhe në kohë, urdhrat e dhëna nga punonjësit e institucionit. Kur një nga punonjësit e institucionit konstaton shkeljen e rregullave, rendit dhe qetësisë në institucion, harton raportin e incidentit, i cili duhet të përmbajë hollësisht faktet dhe rrethanat si dhe të burgosurin përgjegjës për këtë shkelje.

Neni 85
Sjellja në raport me punonjësit e burgut

1. Të burgosurat në raport me punonjësit e burgut duhet të sillen në mënyrë të sjellshme dhe me respekt të dyanshëm.
2. Në rast se një punonjës i institucionit hyn në dhomë ku ndodhen persona të burgosur, ato duhet të mbajnë një qëndrim të përshtatshëm.
3. Kur një punonjës i institucionit hyn në ambientin e punës së të burgosurave, puna në të nuk duhet të ndërpritet.

Neni 86
Sjellja e të burgosurave në raport me njëra-tjetrën

1. Të burgosurat duhet të tregojnë tolerancë dhe respekt reciprok me njëri-tjetrin. Ata duhet të përmbahen nga ndonjë akt dhune, grindje, fyerje apo mungesë të mirësjelljes.
2. Nëse një e burgosur, ndihet e fyer, apo ofenduar nga një e burgosur tjetër, ajo nuk duhet të kërkojë shlyerje personalisht, por është e detyruar të raportojë këtë incident tek punonjësi më i afërt i institucionit.
3. E burgosura nuk lejohet të bëjë tregti me punonjësit e institucionit, apo të burgosurat e tjerë që ndodhen në institucion. Kjo nuk nënkupton vetëm blerjen apo shkëmbimin e sendeve, por edhe dhënien, apo pranimin e tyre si dhurata, dhënien hua apo ndonjë formë tjetër të dhënies apo pranimin të sendeve.

Neni 87
Sjellja e të burgosurave në institucion

1. Gjatë kontrollit të prezencës, apo gjatë rreshtimit për të lëvizur apo për t'u kthyer nga dhe për tek vendi i punës, aktivitete, shërbimi i ushqimit apo të ngjashme, të burgosurat duhet të vendosen me rregull.
2. Prona e institucionit duhet të trajtohet me kujdes dhe nuk duhet të ndryshojë destinacion pa leje. Dëmtimi i kësaj prone duhet të raportohet tek punonjësi më i afërt i institucionit në detyrë. Të burgosurat që shkaktojnë dëm material ndaj pronës së institucionit, ose të burgosurave të tjera janë të detyruar ta dëmshpërblejnë atë.
3. Në mënyrë të veçantë është e ndaluar:

- a. Krijimi i zhurmave të papërshtatshme dhe shqetësuese, veçanërisht thirrja apo, të kënduarit me zë të lartë, fishkëllimat, apo goditjet;
- b. Përdorimi i paautorizuar, apo i papërshtatshëm i ndonjë pajisje elektrike duke përfshirë radiot, apo televizorët;
- c. Hedhja apo zbrazja e sendeve nga ambienti i burgut;
- d. Përdorimi i papërshtatshëm i objekteve dhe inventarit të dhomës;
- e. Shkaktimi i ndotjes së pajisjeve të dhomës, mureve, dyshemesë, korridoreve, tavanit, apo shkarravitja në to;
- f. Ngulja apo ngjitja e fotografive, apo vizatimeve në pajisjet e dhomës dhe muret e dhomës, me përjashtim të vendeve të parashikuara për këtë qëllim. Në çdo rast këto veprime janë të ndaluara në muret e jashtme;
- g. Mbulimi i dritareve të dhomës, dyerve, i dritares së kontrollit, apo i mureve të jashtme;
- h. Ushqyerja e kafshëve të egra, shtëpiake apo jo-shtëpiake;
- i. Thirrja e punonjësit të institucionit duhet të bëhet vetëm për raste të urgjencës, apo për arsye që detyrojnë, apo kërkojnë veprim të menjëhershëm.
- j. Dyert e dhomave, apo të ambienteve të përbashkëta si rregull duhet të rrinë të mbyllura;
- k. E burgosuri duhet të shmangë çdo lloj shqetësimi gjatë pushimit të natës;
- l. Objektet që të burgosurat lejohen të mbajnë pas pranimit në institucion, apo objektet që merren më vonë duhet të mbahen në mënyrë të tillë që nuk rrezikojn rregullin dhe sigurinë.

Neni 88

Pirja e duhanit dhe konsumimi i substancave të palejuara

1. Pirja e duhanit është e ndaluar në shtrat, gjatë kontrollit të prezencës, gjatë përgatitjes për të lëvizur, apo për t'u kthyer, në shkallë, gjatë frekuentimit të aktiviteteve, vizitave të mjekut, në dhomat e pritjes, në infermeri dhe në ambientet e punës, në dhomat e çlodhjes dhe të ushtrimit fizik si dhe kur e burgosura lëviz për jashtë burgut, apo kur transferohet.
2. Ndalesa të mëtejshme për pirjen e duhanit mund të caktohen nga Drejtori i Institucionit.
3. Konsumimi i alkoolit dhe i substancave narkotike është i ndaluar. Testet për drogën janë të lejueshme.

Neni 89

Përgjegjësia për shkaktimin e dëmit

1. Në rastin e dëmtimit të një sendi të luajtshëm ose të paluajtshëm, pronë e institucionit, Drejtori i Institucionit duhet të përcaktojë dëmtuesin dhe masën e dëmit dhe pasi dëgjon të burgosurën përgjegjës, e njofton atë për vlerën e dëmit, duke e ftuar që ta shlyejë atë vullnetarisht. Në rast të kundërt, Drejtori i Institucionit ngre komisionin e vlerësimit të dëmit dhe urdhëron e mbajtjen e vlerës monetare nga numri i llogarisë personale të të burgosurës. Nëse vlera nuk gjendet në llogarinë personale, atëherë thirren familjarët e tyre për të bërë zhdëmtimin kundrejt dokumentacionit ligjor.
2. Në rast dëmtimi të sendeve të të burgosurave nga njëra- tjetrën, Drejtori i institucionit ndërmjetëson për zgjidhjen me mirëkuptim të çështjes. Dëmshpërblimi vullnetar përbën rrethanë lehtësuese kur gjatë shqyrtimit të masës disiplinore, vendoset për masën disiplinore përkatëse. Në rast të kundërt, ndiqet procedura e përcaktuara në pikën 1, të këtij neni.

Neni 90
Klasifikimi i shkeljeve disiplinore

1. Shkeljet disiplinore klasifikohen në shkelje të lehta, shkelje të rënda dhe shumë të rënda.
2. Konsiderohen shkelje të lehta disiplinore:
 - a. neglizhenca në kryerjen e pastrimit personal, të dhomës apo të mjediseve të përbashkëta;
 - b. simulimi i sëmundjes
 - c. Veshja e rroba të shkurtra, të tejdukshme apo veshje që ekspozojnë pjesë të trupit në mënyrë të papërshtatshme.
3. Konsiderohen shkelje të rënda disiplinore:
 - a. përdorimi i fjalëve të pahijshme e fyese ndaj të burgosurve të tjerë, apo personelit të institucionit;
 - b. kryerja e veprimeve, ose akteve me qëllime përfitimi;
 - c. moszbatimi i detyrimeve dhe urdhrave, ose vonimi i pajustificuar i zbatimit të tyre.
 - d. vonesa në kthim nga puna/aktivitete jashtë institucionit, pa njoftuar për arsye të justifikueshme.
4. Konsiderohen shkelje shumë të rënda disiplinore:
 - a. organizimi, pjesëmarrja dhe nxitja e veprimtarive që cenojnë masat e sigurisë në IEVP;
 - b. kundërshtimi me dhunë ndaj punonjësve të IEVP-së;
 - c. ushtrimi i dhunës fizike ose psikike ndaj të burgosurve të tjerë;
 - d. përgatitja dhe përpjekja për t'u larguar nga IEVP-ja ose gjatë shoqërimit të tij;
 - e. largimi nga vendi i punës/aktivitete të tjera dhe mos kthimi në institucion;
 - f. largimi i paautorizuar nga institucion
 - g. kontakti i drejtpërdrejt apo i tërthorët me viktimën/viktimat e veprës penale për të cilën është dënuar, apo familjarët e tyre
 - h. përvetësimi ose dëmtimi me dashje i pasurisë së IEVP-së ose të burgosurave të tjerë;
 - i. dhuna verbale dhe sjellja agresive ndaj të burgosurve të tjerë;
 - j. mbajtja, përdorimi dhe qarkullimi i sendeve të ndaluara, kur nuk përbën vepër penale;
 - k. përdorimi i lëndëve narkotike dhe pijeve alkoolike;
 - l. shkelja e afatit të kthimit në IEVP pas lejes, pa arsye objektive të vërtetuara.
5. Ndaj të burgosurës nuk mund të fillojë procedimi disiplinor në rastet kur sjelljet, veprimet apo mosveprimet e tyre nuk përbëjnë shkelje disiplinore.
6. Masa disiplinore caktohet në përputhje me llojin dhe rëndësinë e shkeljes, qëndrimin e të burgosurës, si dhe vlerësimin e sjelljes.
7. Masat disiplinore zbatohen duke respektuar personalitetin dhe dinjitetin e të burgosurës.
8. Masat disiplinore duhet të përdoren si mjet i fundit i disiplinimit të sjelljes. Në rastet kur është e mundur, autoritetet e institucionit përdorin ndërmjetësimin për zgjidhjen e konflikteve mes të burgosurve, ose mes tyre dhe personelit të institucionit.
9. Masat disiplinore zbatohen në mënyrë që të nxisin ndjenjën e përgjegjësisë dhe aftësinë e vetëkontrollit të të burgosurave.
10. Për personat e diagnostikuar me çrregullime të shëndetit mendor, personat që kanë pasur përvoja të dhunës fizike, psikologjike ose të abuzimit seksual, zbatohet një regjim disiplinor lehtësues në përputhje me nevojat e tyre.
11. Ndaj të miturës që kryen shkelje disiplinore në institucionin vendosen masa disiplinore në përputhje me përcaktimet e bëra në Kodin e Drejtësisë Penale për të Mitur.

Neni 91
Masat parandaluese

1. Drejtori i institucionit mund të urdhërojë veçimin e të burgosurës vetëm për shkelje shumë të rënda, duke e vendosur në mjediset e veçimit, deri në mbledhjen e komisionit disiplinor të institucionit.
2. Komisioni vendos për masën disiplinore me qëllim garantimin e masave të sigurisë në institucion dhe për të parandaluar dëmtime apo pasoja, që mund të vijnë nga sjellja apo veprimet e të burgosurave, si dhe për të demonstruar zbatimin e regjimit dhe rregullave të brendshme në institucion.
3. Në rast se shoqërimi i të burgosurës në dhomat e veçimit është kryer duke përdorur forcën, personeli duhet ta raportojë këtë tek drejtori i institucionit në formular standard dhe e mban të burgosurën në mbikëqyrje.
4. Në rastet e kryerjes së shkeljeve të rënda ose të lehta, masa disiplinore ekzekutohet pas vendimit nga komisioni disiplinor.

Neni 92
Masat disiplinore

1. Për shkeljet disiplinore zbatohen këto masa:
 - a. këshillim individual;
 - b. përjashtim nga veprimtari të përbashkëta (lojra, aktivitete sportive, tema sociale, etj.), deri në 10 ditë;
 - c. përjashtim nga ajrosja në grup deri në 10 ditë;
 - d. përjashtim nga veprimtaritë e përbashkëta deri në 14 ditë;
 - e. anulim e kontratës së punës;/ jo e zbatueshme për të miturat.
 - f. revokimi i vendimit dhe transferimi në një institucion të mbyllur;/ jo e zbatueshme për të miturat.
2. Për shkeljet disiplinore shumë të rënda zbatohen këto masa:
 - a. revokimi i vendimit për transferimin e të dënuarit në sigurinë e ulët;
 - b. kthimin në një institucion të mbyllur për të dënuarit në institucionin e hapur;
 - c. përjashtim nga veprimtaritë e përbashkëta deri në 14 ditë;
3. Për shkeljet disiplinore të rënda zbatohen këto masa:
 - a. përjashtim nga ajrosja në grup deri në 10 ditë;
 - b. përjashtim nga veprimtaritë e përbashkëta deri në 10 ditë.
4. Për shkeljet disiplinore të lehta zbatohen këto masa:
 - a. këshillim individual;
5. Ndalohet dënimi dy herë për të njëjtën shkelje, për të cilën është shprehur më parë me vendim organi kompetent disiplinor.
6. E burgosura ndaj të cilës është dhënë një masë disiplinore, në përputhje me shkronjat "b" dhe "d", të pikës 1, të këtij neni, vendoset në dhomat e veçimit të cilat duhet të respektojnë standardet minimale që zbatohen për qëndrimin e të burgosurave, deri në përfundim të kohëzgjatjes së masës disiplinore.
7. Masat e parashikuara në shkronjat "b", "c" dhe "d", të pikës 1, jepen deri në gjysmën e kohës së parashikuar në rastet e të burgosurve gra. Ndaj të të burgosurave shtatzëne ose që kanë fëmijën nën përkujdesje në institucion, zbatohet vetëm masa disiplinore e parashikuar në shkronjën "a", të pikës 1, të këtij neni.

8. Ndaj të burgosurave me aftësi ndryshe fizike ose çrregullime të shëndeti mendor masat disiplinore të parashikuar në shkronjat "b" dhe "d" të pikës 1 të këtij neni, nuk mund të jepen nëse ndikojnë në përkeqësimin e gjendjes së tyre, bazuar në raportin mjekësor të hartuar nga mjeku i institucionit.
9. Masat disiplinore të përjashtimit nga veprimtaritë e përbashkëta të parashikuara në shkronja "b" dhe "d" të pikës 1 të këtij neni, nuk mund fillojnë të zbatohen pa patur një raport paraprak, të lëshuar nga mjeku që vërteton gjendjen fizike dhe mendore të të burgosurit.
10. Zbatimi i masës disiplinore të përjashtimit nga veprimtaritë e përbashkëta i nënshtrohet kontrollit të përditshëm mjekësor. Regjimi gjatë zbatimit të kësaj mase disiplinore duhet të garantojë të paktën 1 herë kontakte me anëtarët e familjes gjatë periudhës së zbatimit të kësaj mase disiplinore dhe të paktën dy orë ajrim çdo ditë nëse e lejojnë kushtet atmosferike.
11. Masat disiplinore, llojet e tyre dhe kufijtë e zbatimit të tyre ndaj të burgosurave të mitur parashikohen në Kodin e Drejtësisë Penale për të Mitur. Rregullat e posaçme për zbatimin e tyre parashikohen në Rregulloren e Përgjithshme të Burgjeve.
12. Masat disiplinore administrohen në dosjen personale të të burgosurës dhe shërbejnë si referencë gjatë vlerësimit periodik apo me objekt, gjithnjë brenda afatit të parashkrimit.
13. Masa disiplinore parashkruhet, sipas përcaktimeve të ligjit për të drejtat dhe trajtimin e të dënuarve.

Neni 93

Komisioni Disiplinor dhe procedimi disiplinor

1. Në rastin e një shkeljeje disiplinore personeli i institucionit dokumenton shkeljen e ndodhur, nëpërmjet raportit të incidentit, që administrohet në sekretari dhe i vihet në dispozicion Drejtorit të Institucionit, i cili urdhëron fillimin e procedurave disiplinore.
2. Në rastet e shkeljeve shumë të rënda dhe të rënda, masa vendoset nga komisioni disiplinor i institucionit.
3. Masa disiplinore e këshillimit jepet nga Drejtori i institucionit pas sqarimit të rrethanave, komunikimit me të burgosurën dhe pasi kësaj të fundit i garantohet e drejta e mbrojtjes.
4. Komisioni disiplinor përbëhet nga:
 - a. Drejtori i institucionit në cilësinë e kryetarit,
 - b. Përgjegjësi i sektorit ligjor në cilësinë e anëtarit,
 - c. Përgjegjësi i sektorit të sigurisë në cilësinë e anëtarit,
 - d. Përgjegjësi i sektorit të kujdesit social në cilësinë e anëtarit
 - e. Specialisti i sektorit të kujdesit social që trajton të burgosurën në cilësinë e anëtarit
5. Mjeku harton në çdo rast një raport mjekësor, ku shprehet mbi gjendjen shëndetësore të të burgosurës. Ky raport mjekësor i shërben komisionit disiplinor për përcaktimin e masës disiplinore.
6. Komisioni ngrihet dhe funksionon me urdhër të Drejtorit të institucionit, i cili e mbledh atë jo më vonë se 2 (ditë) pune nga momenti i konstatimit të kryerjes së shkeljes.
7. Gjatë mbledhjes së komisionit disiplinor, dëgjoen pretendimet e të burgosurës. Të burgosurës i lejohet mbrojtja me avokat. Për të burgosurën me shtetësi të huaj sigurohet ndihma e një përkthyesi.
8. Komisioni disiplinor merr vendimin përkatës me shumicë votash, i cili i komunikohet të burgosurës dhe i jepet një kopje e saj. Vendimi mund të ankimohet në përputhje me legjislacionin në fuqi.

9. Masat disiplinore evidentohen në regjistrin përkatës dhe në dosjen personale dhe psiko-sociale të të burgosurës.

Neni 94

Procedura e dhënies së masave disiplinore

1. Komisioni disiplinor merr vendim për dhënien e masës disiplinore pasi ka dëgjuar të burgosurën ndaj së cilës po zhvillohet një procedurë një disiplinore.
2. Njoftimi i të burgosurës, ose refuzimi i saj për t'u shprehur përpara komisionit vërtetohet kundrejt nënshkrimit dhe në rastet e kundërshtimit të saj për të firmosur, me nënshkrimin e dy personave të tjerë nga personeli, që nuk janë të përfshirë në ngjarjen.
3. E burgosura mund të mbrohet vetë, ose nga mbrojtësi i saj, kur e çmon të nevojshme. Gjithashtu, atyre ju garantohet e drejta për të thirrur dëshmitarë në emër të tyre, ose për të kundërshtuar provat ndaj tyre, si dhe garantohet kohë e mjaftueshme dhe lehtësi për të përgatitur mbrojtjen.
4. Të burgosurat me shtetësi të huaj gëzojnë të drejtën të kenë përkthyes, nëse nuk mund të kuptojnë, ose flasin gjuhën shqipe.
5. Komisioni disiplinor i dorëzon të burgosurës një kopje të vendimit për marrjen e masës disiplinore brenda 20 ditëve nga momenti i marrjes së vendimit. Kurse për të miturat brenda 10 ditëve.
6. Masa disiplinore nuk mund të jepet nëse kanë kaluar 30 ditë nga konstatimi i saj.

Neni 95

Ankimimi kundër vendimit të komisionit disiplinor

1. E burgosura ka të drejtë të ankimojë masën disiplinore pranë komisionit të apelimit të masave disiplinore në D.P.B, brenda 15 (pesëmbëdhjetë) ditëve nga vënja e saj në dijeni.
2. Komisioni i apelimit vendos lënien në fuqi, shfuqizimin ose kthimin për rishqyrtim, të vendimit të komisionit disiplinor në IEVP brenda 14 ditëve nga marrja e ankimit.

Neni 96

Procedurat disiplinore për të mitur

Procedurat disiplinore, masat, ndalimet, mënyra si ekzekutohen masat disiplinore për të miturat, bazohen në Kodin e Drejtësisë për të Mitur, miratuar me Ligj Nr.37/2017

KREU XI

LEJËT SHPËRBLYESE DHE TË VEÇANTA

Neni 97

Shqyrtimi i kërkesave për leje shpërblyese apo të veçanta

1. Drejtori i institucionit është autoriteti përgjegjës për dhënien e lejeve shpërblyese dhe të veçanta për të dënuarat e sigurisë së zakonshme.
2. Miratimi, apo refuzimi i kërkesave për leje shpërblyese, apo të veçanta duhet të bëhet në përputhje me kërkesat ligjore të parashikuara në nenet 72 dhe 73, të ligjit Nr.81, datë 25.06.2020, "Për të drejtat dhe trajtimin e të dënuarve me burgim dhe të paraburgosurve", me kërkesat e Rregullores së Përgjithshme të Burgjeve, si dhe me udhëzimin e Ministrisë të Drejtësisë.

3. Sektori ligjor në çdo fillim viti dërgon në DPB planifikimin vjetor paraprak të lejeve shpërblyese të të dënuarve që plotësojnë kriteret ligjore, të ndarë sipas një grafiku të përcaktuar.
4. Kërkesat për leje të veçanta dhe shpërblyese i drejtohen Drejtorit të Institucionit dhe regjistrohen në regjistrin e lejeve të të dënuarave.

Neni 98

Lejet shpërblyese

1. Të dënuarat, të cilat respektojnë rregullat e disiplinës rregulloren, dhe janë të motivuar për të marrë pjesë në programet rehabilituese e të ri-integritimit dhe nuk paraqesin rrezikshmëri shoqërore, kanë të drejtë të marrin leje shpërblyese, deri në 20 ditë në vit, të ndarë në çdo tre muaj.
2. Për të dënuarat e mitura kohëzgjatja e lejeve shpërblyese në total, përcaktohet në përputhje me Kodin e Drejtësisë Penale për të Mitur.
3. Planifikimi i lejeve shpërblyese bëhet sipas një grafiku të përcaktuar në fillim të vitit. Me prioritet planifikohen për leje shpërblyese të dënuarat e kategorizuar në burgun e hapur dhe në sigurinë e ulët.
4. Brenda 7 ditëve nga marrja e kërkesës për leje shpërblyese, Drejtori i institucionit vendos miratimin ose jo të saj, duke u bazuar në planifikimin vjetor dhe raportet e vlerësimit të përgjegjësve të sektorit të sigurisë, sektorit të çështjeve shoqërore dhe sektorit ligjor. Në raportet e vlerësimit përfshihen respektimi i kërkesave ligjore, vlerësimi i sjelljes së të dënuarës, vlerësimi i riskut, pjesëmarrje saj në programe rehabilituese dhe ri-integruese, ose në programe të tjera brenda institucionit, besueshmëria që paraqet e dënuara për kthimin e saj në institucion, ekzistenca ose jo e masave disiplinore, marrëdhënia me familjen, si dhe çdo aspekt tjetër që ka të bëjë me profilin e të dënuarës. Për miratimin e lejes duhet vlerësimi pozitiv i të gjithë sektorëve.
5. Leja shpërblyese u jepet:
 - a. të dënuarave deri në 3 vjet burgim, pasi të kenë vuajtur jo më pak se 1/4 e dënimit;
 - b. të dënuarave nga 3 deri në 10 vjet burgim, pasi të kenë vuajtur jo më pak se 1/2 e dënimit;
 - c. të dënuarave mbi 10 vjet burgim, pasi t'u ketë mbetur për të vuajtur më pak se 5 vjet heqje lirie.
6. Në çdo rast, duhet të kenë kaluar të paktën 3 muaj, nga miratimi i lejes shpërblyese të fundit.
7. Të dënuarat të cilët dënohen gjatë vuajtjes së dënimit për një vepër penale të kryer brenda në IEVP, nuk trajtohen me leje shpërblyese.
8. Për të dënuarat të cilët kanë një vendim bashkim dënimesh, përlllogaritja e afatit për të përfituar leje shpërblyese i referohet masës së dënimit të bashkuar, sipas pikës 5 të këtij neni.
9. Në rast refuzimi të dhënies së lejes, e dënuara në seksionin e sigurisë së zakonshme apo të sigurisë së ulët ose përfaqësuesi i saj ligjor, ka të drejtë të bëjë ankim brenda 5 ditëve pranë Ministrit të Drejtësisë, sipas rregullave të parashikuara në Kodin e Procedurave Administrative dhe më pas ka të drejtë të ankohet në gjykatë, e cila vendos për kërkesën për leje. E dënuara në seksionin e sigurisë së lartë ose përfaqësuesi ligjor i saj, mund të paraqesin ankim në gjykatën kompetente brenda 5 ditëve nga marrja dijeni.
10. Procedurat e dhënies së lejeve përcaktohen me udhëzim të Ministrit të Drejtësisë.

Lejet e veçanta

1. Drejtori i institucionit është personi përgjegjës për shqyrtimin e kërkesës së të burgosurës për lejë të veçantë sipas procedurës së mëposhtme:
 - a. Kërkesa e të burgosurës duhet të jetë e argumentuar dhe e shoqëruar nga dokumentacioni përkatës. Në raste sëmundjesh të rënda, të cilat rrezikojnë jetën e anëtarëve të familjes së të burgosurës, kërkesa duhet të shoqërohet me raportin mjekësor të familjarit të sëmurë ku vërtetohet gjendja e rëndë shëndetësore e tij.
 - b. Në rastet e ngjarjeve të rëndësishme familjare si vdekje, lindje apo martesë, kërkesa duhet të shoqërohet me dokumentin zyrtar që provon vdekjen, lindjen apo martesën. Me anëtar të familjes së të burgosurës nënkuptohen nëna, babai, fëmijët, gjyshërit, motra, vëllai, bashkëshorti/ja, ose në rastet kur martohet vetë, si dhe në rastet e dhënies së provimeve nga ana e tij/saj.
 - c. Pas marrjes së kërkesës dhe dokumentacionit përkatës nga e burgosura, Drejtori i Institucionit, urdhëron brenda ditës së marrjes së kërkesës, përgjegjësin e sektorit ligjor, përgjegjësin e sektorit të sigurisë dhe përgjegjësin e sektorit të çështjeve shoqërore, për shqyrtimin dhe përgatitjen e dokumentacionit që do të shërbejë si bazë e miratimit apo refuzimit të lejes së veçantë.
 - d. Lidhur me lejet e veçanta për arsye shëndetësore të anëtarëve të familjes së të burgosurës, dokumenti mjekësor që përcakton sëmundjen e rëndë e cila rrezikon jetën e anëtarit të familjes së të burgosurit shoqëron kërkesën për lejë të veçantë, vlerësohet edhe nga përgjegjësi i sektorit të shëndetësisë në institucion, ose në mungesë të tij nga mjeku i institucionit, i cili bën akt verifikimin e epikrizës mjekësore duke kontrolluar të gjitha elementet që provojnë vërtetësinë e saj, shprehet me shkrim për shkallën e rrezikshmërisë së sëmundjes së anëtarit të familjes së të burgosurës kontrollon nëpërmjet komunikimit telefonik me qendrën spitalore, ku është shtruar e sëmura, ose me mjeket që kanë nënshkruar epikrizën. Akt verifikimi i mjekut dhe mendimi me shkrim i tij i bashkëlidhen raportit të përbashkët të tre sektorëve të përcaktuar në paragrafin "b", të pikës 1, të këtij neni.
 - e. Përgjegjësi i sektorit të sigurisë dhe përgjegjësi i sektorit të çështjeve shoqërore përgatisin, brenda ditës nga data e marrjes së urdhrit, një raport të përbashkët, të hollësishëm, i cili shpjegon dhe dokumenton lidhjen e ngushtë familjare të të burgosurës me personin e sëmurë rëndë, të vdekur, të lindur ose të martuar, kohëzgjatjen e vuajtjes së dënimit, lejet e kryera më parë, respektimin e rregullores së brendshme të institucionit, rrezikshmërinë dhe besueshmërinë që paraqet i burgosuri, përmes qëndrimit të saj jashtë institucionit, pjesëmarrjen në programe rehabilituese, që zhvillohen në institucion, çdo të dhënë tjetër që ka të bëjë me të burgosurën, si dhe propozimin e argumentuar të miratimit, apo të refuzimit të lejes së veçantë dhe të ditëve që duhet të marrë i burgosuri, si leje e veçantë.
 - f. Raporti, propozimi dhe dokumentacioni i paraqiten brenda ditës Drejtorit të Institucionit, i cili e shqyrton dhe jep miratimin, apo refuzimin e motivuar të lejes së veçantë.
 - g. Leja e veçantë mund të miratohet nga Drejtori i institucionit, vetëm pasi të ketë marrë mendimin pozitiv të tre sektorëve, hartues të raportit, në favor të miratimit të saj nga përgjegjësi i sektorit ligjor, përgjegjësi i sektorit të sigurisë dhe përgjegjësi i shërbimit social.
2. Drejtori i Institucionit që jep lejën, duhet të përcaktojë mënyrën, kushtet, mjetet e shoqërimit të të burgosurit, me forca të policisë së burgjeve dhe numrin e tyre. Leja e

veçantë për të dënuarat jepet me kohëzgjatje deri në 48 orë, dhe bëhet me shoqërim vetëm gjatë ditës.

3. Leja e veçantë mund të zgjatet me kërkesë të të dënuarës edhe 24 orë të tjera me miratimin e Drejtorit të Institucionit, vetëm për rastet e sëmundjeve të rënda, kundrejt dokumentacionit ligjor të paraqitur në institucion.
4. Leja e veçantë pa shoqërim, mund të miratohet vetëm për të dënuarat të cilët janë trajtuar më parë me lejë shpërblyese.
5. Lejë e veçanta për të paraburgosurat jepen sipas kërkesave të këtij neni, me miratimin e prokurorit dhe me shoqërim.

Neni 100

Lejë e veçanta për të paraburgosurat

1. Të paraburgosurat nuk përfitojnë lejë shpërblyese.
2. Me miratimin paraprak të Prokurorit dhe të Drejtorit të institucionit, të paraburgosurës mund t'i jepet leje e veçantë për:
 - a. lindje të fëmijës së të paraburgosurës;
 - b. martesë e fëmijës, vëllait, motrës, apo prindit të të paraburgosurës;
 - c. vdekje e fëmijës, bashkëshortit/bashkëshortes, gjyshërit, vëllait, motrës apo prindit të të paraburgosurës, ose të bashkëshortit/es të saj.
 - d. në rast të sëmundjeve të rënda, të cilat rrezikojnë jetën e anëtarëve të familjes, të vërtetuar me raport mjekësor
 - e. dhënia e provimeve të vetë të paraburgosurit.
3. Vërtetimi i fakteve juridike dhe identifikimi i personave të mësipërm bëhen në bazë të dokumenteve të lëshuara për këto raste nga institucionet përkatëse.

Neni 101

Leja për të miturën e dënuar me burgim

1. E mitura e dënuar me burgim ka të drejtë të marrë leje të shkurtër nga vendi i vuajtjes së dënimit tre herë në vit. Kohëzgjatja e kësaj leje nuk i kalon 15 ditë. Në këtë kohë përfshihet edhe koha e nevojshme për udhëtim në familjen e tij ose në destinacion.
2. E mitura e dënuar me burgim ka të drejtë të marrë një leje të shkurtër nga vendi i vuajtjes së dënimit në rast se:
 - a. ka kryer jo më pak se një të tretën e dënimit, nëse është dënuar me burgim deri në 3 vjet;
 - b. ka kryer jo më pak se gjysmën e dënimit, nëse është dënuar me burgim deri në 8 vjet;
 - c. ka kryer jo më pak se dy të tretat e dënimit, nëse është dënuar me burgim mbi 8 vjet

KREU XII

TRAJTIMI I KATEGORIVE TË TJERA

Neni 102

Trajtimi i të burgosurave me shtetësi të huaj

1. Të burgosurat shtetase të huaja ju mundësohet njoftimi i familjes, përfaqësuesit ligjor, përfaqësuesit konsullor, ose organizatës kompetente që vepron në fushën e mbrojtjes së të drejtave të njeriut.
2. Të burgosurave shtetase të huaj, që nuk kanë përfaqësi diplomatike, ose konsullore në vend, ose personave pa shtetësi, u mundësohet komunikimi me përfaqësitë diplomatike të shtetit që mbrojnë interesat e tyre ose me autoritetin kombëtar ose ndërkombëtar, detyra e të cilit është mbrojtja e interesave të këtyre personave.

Neni 103

Veprimet në rast vdekje të të burgosurave të huaj

1. Në rastin e vdekjes së të burgosurave të huaja, njoftimi i vdekjes bëhet nëpërmjet Ministrisë së Jashtme, përfaqësuesve diplomatikë ose konsullorë në Republikën e Shqipërisë, të shtetit të cilit ajo i përket, përfaqësuesve të shtetit që merr në mbrojtje interesat e tyre, ose nëpërmjet autoriteteve kombëtare apo ndërkombëtare, që kanë për qëllim të veprimtarisë së tyre mbrojtjen e interesave të këtyre personave.
2. Në rastin e të burgosurave të huaja që nuk u dihet vendbanimi, familjarët ose personat e tjerë të caktuar më parë nga ai, njoftimi i tyre bëhet të paktën në dy media kombëtare për një periudhë 10 ditore.

Neni 104

Trajtimi i të burgosurave të minoriteteve etnike ose gjuhësore

Të burgosurat që i përkasin minoriteteve etnike ose gjuhësore, të huaja ose persona pa shtetësi pajisen me informacion me gojë dhe me shkrim, në gjuhën që ata kuptojnë, për të drejtat dhe detyrimet e tyre në institucion, si dhe nëse është e mundur ju ofrohen kurse të gjuhës shqipe.

Neni 105

Trajtimi i të burgosurave me aftësi të kufizuar

1. Të burgosurave me aftësi të kufizuara u ofrohet trajtim dhe sigurim shëndetësor, në mënyrë të drejtë dhe të arsyeshme.
2. Shërbimi shëndetësor i të burgosurave me aftësi të kufizuar u ofrohet me të njëjtën cilësi dhe standard të shërbimeve shëndetësore në strukturat e shëndetit publik dhe pa pagesë.

Neni 106

Trajtimi i të burgosurave me HIV/AIDS

Për të burgosurat me HIV/AIDS garantohet trajtim specifik falas dhe ofrohet këshillim për HIV/AIDS-in, me qëllim përgatitjen e të burgosurës për përballimin e pasojave të mundshme të stresit dhe për t'i ndihmuar në marrjen e vendimeve bazuar në informacionet për HIV/AIDS-in. Këshillimi përfshin informimin, edukimin dhe mbështetjen psiko-sociale, të cilat i mundësojnë personit me HIV/AIDS të jetojë dhe parandalojë transmetimin e virusit HIV/AIDS.

KREU XIII

NJOFTIM PËR VDEKJET, SËMUNDJET E TË BURGOSURAVE

Neni 107

Njoftimet për rastet e sëmundjeve dhe vdekjeve

1. Në rastet e sëmundjeve të rënda, dëmtimeve serioze të të burgosurës, Institucioni, njofton menjëherë familjarët ose të afërmit dhe në çdo rast, çdo person tjetër të caktuar më parë nga e burgosura.
2. E burgosura duhet të njoftohet menjëherë për vdekjen dhe sëmundjen e familjarëve dhe të afërmeve të saj.
3. E mitura duhet të njoftohet menjëherë në mënyrë të përshtatshme dhe në prani të psikologut për vdekjen apo sëmundje serioze të familjarëve dhe të afërmeve.

Neni 108

Veprimet në rast vdekjeje

1. Në rast vdekjeje të të burgosurës institucioni merr masa për kryerjen e procedurave ligjore, që kanë të bëjnë me verifikimin e rastit, shkakun e vdekjes, kryerjen e veprimeve procedurale hetimore, si dhe veprimeve të tjera për sqarimin dhe dokumentimin e faktit të vdekjes.
2. Institucioni njofton menjëherë D.P.B, prokurorin, familjarët dhe në mungesë të familjarëve autoritetet e gjendjes civile.
3. Sendet personale dhe depozitat në të holla të të burgosurës i dorëzohen familjarëve, sipas procedurave dhe dokumentacionit përkatës.
4. Në qoftë se brenda 6 (gjashtë) muajve nga vdekja e të burgosurës sendet e saj nuk janë tërhequr nga familja ose të afërmit e saj, ato dërgohen në organet e qeverisjes vendore të vendbanimit të tij.
5. Në rast se e burgosura e vdekur nuk merret nga familja ose të afërmit e saj, personeli i institucionit kujdeset me organet e pushtetit vendor për varrosjen e saj në varrezat publike, duke përballuar shpenzimet e nevojshme dhe duke bërë shënimin e duhur në regjistrin themeltar.

KREU XIV

DISPOZITA TË FUNDIT

Neni 109

Mbrojtja shtesë e të paraburgosurave

1. Në asnjë rast të paraburgosurat nuk trajtohen si të dënuara, ose si persona që mund të dënohen në të ardhmen.
2. Të paraburgosurat gëzojnë të drejtat dhe detyrimet që gëzojnë të dënuarat me burgim për aq sa nuk parashikohet ndryshe në këtë rregullore dhe legjislacionin në fuqi.
3. Të paraburgosurat lejohen të informojnë menjëherë familjen për vendndodhjen e tyre. Atyre u krijohen të gjitha kushtet e nevojshme të takohen me familjarët, me përjashtim të rasteve kur kjo pengon, ose nuk është në interes të zhvillimit të hetimit dhe gjykimit.
4. Drejtori i institucionit kufizon të drejtën e të paraburgosurave për të pritur vizita, për të kryer letërkëmbim, apo për biseda telefonike, kur është e nevojshme, për kryerjen e veprimeve procedurale penale të urdhëruara nga organi procedues përkatës.

Neni 110

Këshillimi ligjor

Të burgosurat informohen në çdo rast për të drejtën për të përfituar këshillim ligjor dhe ju krijohen procedura lehtësuese që ata të takohen me mbrojtësit ligjorë dhe të përgatitin mbrojtjen përgjatë gjithë gjykimit.

Neni 111

Ndihma juridike

1. Të burgosurat informohen në çdo rast për të drejtën për të përfituar ndihmë juridike të garantuar nga shteti, nëse mbrojtja është e detyrueshme ose nuk ka mundësi financiare për të pasur një mbrojtës, në përputhje me legjislacionin në fuqi për ndihmën juridike të garantuar nga shteti.
2. Mjediset ku mbahen të burgosurat duhet të ofrojnë mundësinë që ata të takohen privatisht dhe të komunikojë me mbrojtësit dhe të kenë kohën dhe lehtësitë e mjaftueshme për të përgatitur mbrojtjen përgjatë gjithë gjykimit.
3. Të burgosurve të mitur ju garantohet ndihmë juridike dhe psikologjike, si dhe ushtrimi i të gjithë të drejtave të parashikuara në Kodin e Procedurës Penale dhe Kodin e Drejtësisë Penale për të Mitur.

Neni 112

Lirimi i të paraburgosurave

1. Lirimi i të paraburgosurës urdhërohet nga gjykata ose prokuroria.
2. Në rastet kur e burgosura e liruar nuk ka mundësi strehimi ose transporti pranë familjes së tij, drejtori i institucionit, në bashkëpunim me institucionet vendore, si dhe organizatat e tjera, mundësojnë sistemimin dhe transportin e tij.
3. Në rast pamundësie objektive të të burgosurës për t'u larguar nga institucioni pas lirimit, me kërkesën e saj, IEVP-ja mundëson strehimin në institucion, jashtë regjimit të brendshëm deri në përfundimin e pengesës për largim.
4. Personeli menjëherë pas lirimit të të paraburgosurës apo të të dënuarës, plotëson të dhënat në sistemin MISP si dhe njofton policinë dhe prokurorinë për ekzekutimin e vendimit penal.

Neni 113

Ky draft i Rregullores së Brendshme është hartuar me qëllim përcaktimin e parimeve dhe rregullave për një zbatim sa më efikas dhe të drejtë të Ligjit nr. 81/2020, "Për të drejtat dhe trajtimin e të dënuarve me burgim dhe të paraburgosurve", Rregullores së Përgjithshme të Burgjeve të miratuar me VKM nr. 209, datë 06.04.2022, si dhe legjislacionit në fuqi që rregullon ekzekutimin e vendimeve penale.

Draft-rregullorja synon të shërbejë si një instrument pune në funksion të respektimit të të drejtave dhe lirive themelore të njeriut, duke vendosur në qendër rehabilitimin dhe riintegrimin social të të burgosurave. Si dokument në fazë paraprake, ajo mbetet e hapur për shqyrtim, vlerësim dhe përmirësim të mëtejshëm nga palët përkatëse.

Kjo Rregullore hyn në fuqi 15 ditë pas miratimit nga Drejtori i Përgjithshëm i Burgjeve